



BESLUITEREGISTER

vir die 15de vergadering van die

ALGEMENE SINODE

van die

**NEDERDUITSE GEREFORMEERDE
KERK**

**VEREMARKSAAL, PORT ELIZEBETH
Sondag 6 tot Donderdag 10 Oktober 2013**

BESLUITEREGISTER 2013

ABORSIE (vgl Agenda A.10.1 bl 92 pt 11.3; Notule Dag 4 pt 26)

Die Algemene Sinode verwys die opdrag van 2011 oor aborsie na die **ATLAS** vir aandag.

ALGEMENE SINODALE WERKSAAMHEDE: BENAMING VAN TAAKSPANNE (vgl Notule Dag 3 pt 14)

Die Algemene Sinode keur goed dat die benaming vir die Algemene Taakspan Argief, die Algemene Taakspan Regte, die Algemene Taakspan Predikantesake (voorheen Algemene Bevoegdheidsraad) en die Algemene Kuratorium ook verander word na die Algemene Steunspan Argief, die Algemene Steunspan Regte, die Algemene Steunspan Predikantesake en die Algemene Steunspan Teologiese Opleiding en dat die betrokke reglemente dienoreenkomstig aangepas word.

ALGEMENE SINODE: FREKWENSIE EN SAMESTELLING VAN DIE (vgl Agenda A.12.2 (Aanvullend) bl 31 pt 4; Notule Dag 5 pt 20)

1 Die Algemene Sinode volstaan by Kerkorde Artikel 42.1: “Die Algemene Sinode besluit self wanneer die volgende Algemene Sinode byeenkom, met dien verstande dat die Algemene Sinode nie langer as vier jaar uitmekaar vergader nie.”

2 Die Algemene Sinode besluit dat, in die lig van die snelveranderende tyd en die lading van die werk en akuele sake, die Algemene Sinode in 2015 vergader met dieselfde getal afgevaardigdes as in 2013 (200).

3 Die Algemene Sinode gee die Ontwerpspan van die volgende Algemene Sinodale vergadering opdrag om genoegsame tyd tydens die Sinodevergadering in te ruim vir ’n behoorlike evaluering en besinning oor:

3.1 Die frekwensie van Algemene Sinodale vergaderings

3.2 Die getal en samestelling van die afgevaardigdes na die Algemene Sinode vergadering.

ALGEMENE SINODE: STRUKTURERING VAN WERKSAAMHEDE (vgl Agenda A.12.2 (Aanvullend) bl 27 pt 1.3, T.14.3 bl 10 pt 9.1.3; Notule Dag 4 pt 28)

1 Die Algemene Sinode aanvaar die vertrekpunte soos uitgespel in pte 2.1 – 2.8 en versoek die Moderamen en die Bedryfspan om in die werksaamhede van die Algemene Sinode daaraan uitvoering te gee.

2 Die Algemene Sinode dra dit aan die Algemene Taakspan/Steunspan Regte op om die nodige redaksionele wysiginge in die Kerkorde en reglemente aan te bring ten einde aan diestrukturele veranderinge uitdrukking te gee.

3 Die Algemene Sinode versoek die Algemene Steunspan Fondse en Bates om in oorleg met die Algemene Steunspan Regte ’n Reglement vir die Ouditkomitee van die Algemene Sinode saam te stel en vir tussentydse goedkeuring en implementering aan die Moderamen voor te l.. Die volgende Algemene Sinode doen die finale goedkeuring.

ALGEMENE VERKIESING 2014 (vgl Notule Dag 5 pt 9)

Die Algemene Sinode versoek gemeentes om ernstig voorbidding te doen vir die Algemene Verkiesing van 2014.

APARTHEID: DIE NG KERK EN (vgl Agenda A.12.11.3 bl 235 pt 2.9.3; Notule Dag 5 pt 6)

Die Algemene Sinode keur die dokument **Die NG Kerk en Apartheid** goed as ’n pastorale woord aan die lidmate van die NG Kerk.

APOSTOLICUM (vgl Agenda A.10.1 bl 92 pt 10.2; Notule Dag 4 pt 9)

1. Die Algemene Sinode bedank die teoloë uit die NG Kerkfamilie wat die dokument, *Die Apostoliese Geloofsbelydenis – ’n Eietydse uitleg*, as geskenk vir die Kerkfamilie voorberei het. Bybel-Media, wat ’n sewe-weke gespreksgids, gerig op lidmate, oor die dokument ontwikkel, word ook bedank.

2. Die Algemene Sinode ontvang hierdie eietydse uitleg as ’n gespreksdokument wat eerlik wil kyk na al die baie vrae wat oor ons geloof gevra word, maar ook kontoere wil gee waarbinne na antwoorde in die lig van die Skrif gesoek moet word.

3. Die Algemene Sinode stuur die dokument na die verskillende sinodes vir bespreking en terugvoer, met die versoek dat gesprek wyd oor die dokument gevoer word. Die Moderamen wys ’n projekspan aan om die proses van gesprek, evaluering en terugvoer te begelei.

ARMOEDE EN SOSIALE ONGERECHTIGHEID: STRYD TEEN (vgl Agenda A.12.5 bl 190 pt 6; Notule Dag 5 pt 3)

1 Die Algemene Sinode bevestig opnuut dat die volgehoue stryd teen armoede en ongerechtigheid 'n hoë prioriteit op die kerk se agenda moet wees. Derhalwe versoek die Algemene Sinode die KMDR en VDDG om:

1.1 verder navorsing te doen oor die impak van kerklike programme op armoede en ongerechtigheid;

1.2 navorsing te doen oor die verband tussen arbeidsverwante wetgewing en die optrede van vakunies aan die een kant en werksverliese, armoede en sosiale ongerechtigheid aan die ander kant.

1.3 navorsing te doen oor die verhouding en samewerking tussen gemeentes en kerklike maatskaplike diensorganisasies ten opsigte van die stryd teen armoede, werkloosheid en ongerechtigheid;

1.4 die riglyne in die verslag verder te ontwikkel in strategieë wat deur gemeentes geïmplementeer kan word;

1.5 Hugenote Kollege te betrek om gepaste kursusse te ontwikkel wat gemeentes in die uitvoering van hulle diakonale roeping kan ondersteun.

ARTIKEL 3 (vgl Agenda A.14 bl 257 pt 8.2.2.1; Notule Dag 3 pt 17)

Wysig voetnota 1 om soos volg te lui: *Vergelyk Artikel 10.*

ARTIKEL 6: WYSIGING (vgl Agenda B.1 bl 281 pt 4, T.14.2 bl 4 pt 5.1.3; Notule Dag 5 pt 19)

Die Algemene Sinode onderskrif nie pt 4 van Beskrywingspunt B.1 nie.

ARTIKEL 7 EN 8 (vgl Agenda A.14 (Aanvullend) bl 40 pt 1.1.1 en 1.1.2; Notule Dag 3 pt 17)

Die Algemene Sinode skrap die huidige Artikels 7 en 8 en vervang dit met die volgende:

ARTIKEL 7

7.1 'n Bedienaar van die Woord word vir diens aan 'n gemeente beroep deur die kerkraad van die gemeente met approbasie deur die gemeente en goedkeuring deur die ring.

7.2 'n Bedienaar van die Woord word vir diens aan die kerkverband deur 'n kerkvergadering of sy gevolmagtigde benoem met approbasie deur die kerkverband en goedkeuring deur die betrokke sinodale regs-/kerkordekommissie.

ARTIKEL 8

8.1 Die bevestiging van 'n bedienaar van die Woord vir diens aan 'n gemeente geskied nadat goedkeuring daartoe verleen is deur die ring of sy gevolmagtigde.

8.2 Die bevestiging van 'n bedienaar van die Woord vir diens aan die kerkverband geskied nadat goedkeuring daartoe verleen is deur die betrokke sinodale regs-/kerkordekommissie.

8.3 Die bevestiging van 'n proponent geskied met handoplegging.

8.4 'n Bedienaar van die Woord wat 'n beroep na 'n ander gemeente aangeneem het of 'n benoeming vir diens aan die kerkverband aanvaar het, ontvang 'n akte van demissie van die kerkvergadering in wie se diens gestaan is.

8.5 'n Bedienaar van die Woord wat emeriteer, ontvang 'n akte van emeritaat.

ARTIKEL 12 (vgl Agenda A.14 (Aanvullend) bl 41 pt 1.1.3; Notule Dag 4 pt 27)

12.1 Die bedienaar van die Woord word vir die uitvoering van die amp of bediening deur 'n kerkvergadering (kerkraad, ring, sinode, Algemene Sinode) in diens gestel.

ARTIKEL 22 (vgl Agenda A.14 bl 257 pt 8.2.2.2; Notule Dag 3 pt 17)

22.2 'n Meerdere vergadering het die bevoegdheid om 'n saak wat 'n mindere vergadering moes afhandel onder die volgende omstandighede te hanteer:

22.2.1 waar 'n mindere vergadering nie bestaan nie; en

22.2.2 in die geval van onvermoë of wanbestuur by die mindere vergadering.

ARTIKEL 26.2 (vgl Agenda B.25 bl 318, T.14.3 bl 10 pt 11.1, T.14.4 bl 8 pt 11.1; Notule Dag 5 pt 19)

Die saak word verwys na die ATR.

ARTIKEL 31 (vgl Agenda A.14 bl 258 pt 8.2.2.3; Notule Dag 3 pt 17)

Wysig voetnota 4 om soos volg te lui: *Vergelyk die Reglement vir Vermeerdering, Kombinerings, Eenwording en Samesmelting van Gemeentes.* en die Vorming van 'n Nuwe Kerkverband.

ARTIKEL 43.[1].13: UITBREIDING VAN (vgl Agenda A.12.11 bl 233 pt 1.4; T.14.3 bl 9 pt 8.1.6; Notule Dag 5 pt 6)

1 Die Algemene Sinode neem kennis van Aanbeveling 1.4 op bladsy 233 van die Agenda.

2 Die Algemene Sinode voeg by voetnota 18 die volgende by: *Vergelyk ook Artikel 67.4*

ARTIKEL 44 (vgl Agenda T.14.2 bl 5 pt 4.2.3; Notule Dag 3 pt 5)

1 Die gewysigde Artikel 44.1 lees: “Die wysiging van die Belydenis kan alleen geskied nadat elke sinode afsonderlik met ’n tweederdemeerderheid én twee derdes van alle kerkrade elk met ’n tweederdemeerderheid ten gunste daarvan besluit het.”

2 Die besluit is onmiddellik van krag.

ARTIKEL 44 (vgl Agenda A.14 bl 258 pt 8.2.2.4; Notule Dag 3 pt 17)

Wysig voetnota 5 om soos volg te lui: Vir die wyse waarop die besluit van kerkrade oor die verandering van die belydenisgrondslag van die NG Kerk hanteer word ten einde die instemming en approbasie van ten minste twee derdes van belydende lidmate van gemeentes met die besluit te verkry, vergelyk die *Reglement vir die Vermeerdering, Kombinerings, Eenwording en Samesmelting van Gemeentes, en die Vorming van ’n Nuwe Kerkverband*, punt 6 Wysiging van die Belydenis.

ARTIKEL 65.2 (vgl Agenda A.14 (Aanvullend) bl 41 pt 1.1.4; Notule Dag 4 pt 27)

65.2 Oor leerstellige sake (vergeelyk Artikel 44.4) en oor die beëindiging van bevoegdheid (vergeelyk Artikel 6) kan tot by die Algemene Sinode geappelleer word.

ARTIKEL 70 (vgl Agenda A.14 bl 258 pt 8.2.2.5; Notule Dag 3 pt 17)

70.1 Die Kerk streef daarna om deur middel van sy vergaderinge op ’n verantwoorde wyse met ander Christelike kerke *en kerkgemeenskappe* saam te werk of te assosieer, ’n gemeenskaplike boodskap uit te dra en saam te stry vir die behoud van Christelike lewensbeginsels.

70.2 Die Algemene Sinode bepaal die aard en graad van die *samewerking* met ander kerke of kerkgemeenskappe deur middel van ’n gewone meerderheidstem. *Wanneer ’n kerk of kerkgemeenskap by die Algemene Sinode aansoek doen om in assosiasie met die NG Kerk te tree, word goedkeuring verleen wanneer met ’n tweederdemeerderheidstem ten gunste daarvan beslis is. Die aard en omvang van die assosiasie word deur die assosiasie-ooreenkoms gereël.*

70.3 Die graad en wyse van samewerking of assosiasie word in elke geval bepaal deur die graad van ooreenstemming ten opsigte van belydenis, kerkregering, erediens en die siening van die Christelike lewenswandel van die betrokke kerk of kerkgemeenskap.

BEDIENING IN BUITENGEWONE OMSTANDIGHEDE (vgl Agenda T.14.3 bl 10 pt 13.1; Notule Dag 5 pt 19)

1 Die Algemene Sinode besluit om die volgende in die Kerkordeboek op te neem onder die funksionele besluite:

1.1 Die *status quo* word gehandhaaf naamlik dat daar net drie soorte poste vir bedienaars van die Woord is, te wete voltyds-onbepaalde pos, tentmakerpos (deelyds onbepaald) en vaste termynpos (voltyds of deelyds).

1.2 Waar in buitengewone omstandighede ’n bedieningsbehoefte ontstaan wat nie deur punt 1.1 bevredig kan word nie, het die sinodale regs-/kerkordekommissie diskresie om op versoek van die ring aan ’n gemeente toestemming te verleen om gebruik te maak van die dienste van ’n emeritus ouer as 70 jaar.

1.3 Hierdie reëling geld net vir ’n jaar en moet daarna hersien word.

1.4 Verslag van die gemeentelike bediening moet jaarliks deur die kerkraad en konsulent aan die ring lewer word.

BEDIENING VAN BEVRYDING (vgl Agenda A.10.1 bl 91 pt 8.2, B.3 – B.12 bl 283-299; Notule Dag 4 pt 18)

Die Algemene Sinode vervang die huidige punt 7 van die 2011-besluit met die verbeteringsvoorstel (aangepas) wat die Oostelike Sinode in hul beswaarskrif stel, te wete:

Die AS aanvaar die werklikheid dat daar ’n wye diversiteit van interpretasies en toepassing van die Bybelse boodskap oor die bese en demone binne die NG Kerk is. Daar is lidmate wat die persoonlike aard van die duiwel en demone aanvaar, en daar is lidmate wat die nie-persoonlike aard van die duiwel en demone aanvaar. Albei standpunte erken die realiteit van die bese.

BEDIENING VAN BEVRYDING (vgl Agenda A.10.1 bl 91 pt 8.2, B.3 – B.12 bl 283-299; Notule Dag 4 pt 18)

1 Die Algemene Sinode neem die besware wat oor hierdie saak handel (punt 7 van die besluit oor die Bediening van Bevryding) baie ernstig op en verseker lidmate en gemeentes dat die Sinode hierdie saak op geen manier wil ontduik nie.

2 Die Sinode oordeel dat die bewering in die beskrywingspunt van Vryheid-Wes nie reg is dat daar in die besluite van die Sinode afgewyk word van ons Gereformeerde geloof in die krag van God se

Woord wat mense bevry nie. Die standpunt van die Sinode propageer nie allerlei slagspreuke of formules vir bevryding nie.

BEDIENING VAN BEVRYDING (vgl Agenda B.10 bl 296; Notule Dag 4 pt 18)

Die Algemene Sinode verwys B.10 (Bediening van Bevryding: Vryheid-Wes) na die Algemene Taakspan vir Leerstellige en Aktuele Sake vir hantering.

BELYDENIS VAN BELHAR (vgl Agenda A.12.4 pt 7.1 bl 173 en T.12.3.1 bl 2 pt 4; vgl ook T.14.2 bl 5 pt 4; Notule Dag 3 pt 5)

1 Die Algemene Sinode bekragtig die advies van die ATR tov die uitleg en toepassing van die besluit van die Algemene Sinode 2011 oor die Belydenis van Belhar.

2 Die Algemene Sinode keur die wysiging van Art. 44.1, soos deur die Algemene Sinode 2004 asook al tien die sinodes goedgekeur, sonder verdere verwysing finaal goed (met 'n twee-derde meerderheid).

3 Die Algemene Sinode stel die volgende wysiging van Artikel 1 van die Kerkorde voor vir voorlegging aan die kerkverband (gemeentes en sinodes), ooreenkomstig Art. 44 van die Kerkorde – goedgekeur met twee-derde meerderheid:

Kerkorde Artikel 1

1 Die Nederduitse Gereformeerde Kerk is gegrond op die Bybel as die heilige en onfeilbare Woord van God.

2.1 Die leer wat die Kerk in ooreenstemming met die Woord van God bely, word verwoord in

2.1.1 die ekumeniese belydenisse, naamlik die Apostoliese Geloofsbelydenis, die Geloofsbelydenis van Nicea en die Geloofsbelydenis van Athanasius; en

2.1.2 die Drie Formuliere van Eenheid, naamlik die Nederlandse Geloofsbelydenis, die Heidelbergse Kategismus en die Dordtse Leerreëls.

2.2 Die Belydenis van Belhar is deel van die belydenisgrondslag van die Kerk, op so 'n wyse dat daar ruimte is vir lidmate, ampsdraers en vergaderinge wat dit as in ooreenstemming met die Woord van God bely, sowel as vir lidmate, ampsdraers en vergaderinge wat dit nie as 'n belydenisskrif onderskryf nie.

3 Die Kerk aanvaar dat haar roeping om haar geloof te bely, altyd geld en dat 'n uitbreiding van haar belydenisgrondslag sonder dwang geskied.

4 Die Algemene Sinode dra dit aan die Moderamen op om die kerkverband te lei in die besluitnemingsproses oor die voorgestelde wysiging van Artikel 1 deur in oorleg met die onderskeie Sinodes 'n roetekaart en tydraamwerk vir die aanvang, verloop en afhandeling van die proses te bepaal.

5 Die Algemene Sinode ontvang die materiaal en studiestukke met die oog op die Belydenis van Belhar vir gebruik in die kerkverband.

6 Die Algemene Sinode doen 'n beroep op lidmate en vergaderinge om hierdie proses van besluitneming in 'n gees van gebed, onderskeiding van die wil van God, en in wedersydse respek en liefde te onderneem.

BELYDENIS VAN DIE KERK EN SY LEIERS (vgl Agenda B.26 (Aanvullende Agenda) bl 53, T.14.4 bl 8 pt 12.1; Notule Dag 5 pt 19)

Die Algemene Sinode verwys die saak na die Algemene Taakspan Regte.

BELYDENISWYSIGING (vgl Agenda B.14 bl 100, A.10.1 bl 91 pt 6.2, T.14.3 bl 3 pt 3.1.2; Notule Dag 4 bl pt 27)

Die Algemene Sinode keur Aanbeveling 6.2 (Agenda bl 91) goed: Hierdie saak word verwys na die Tydelike Taakspan Regte.

BELYDENISWYSIGING (vgl Agenda B.14 bl 300, A.10.1 bl 91 pt 6.2, T.14.3 bl 3 pt 3.1.2, T.14.4 bl 7 pt 8.2; Notule Dag 5 pt 19)

1 Die Algemene Sinode wys Beswaarskrif B.14 (Agenda bladsy 300) van die hand en wel op die volgende gronde:

1.1 Die Algemene Sinode het in terme van Artikels 43.1.1 en 43.1.6 die bevoegdheid om in ooreenstemming met Artikels 44.1 en 44.3 die belydenisgrondslag van die NG Kerk te wysig sonder dat 'n voorstel tot wysiging eers vanaf 'n mindere vergadering kom en deur al die mindere vergaderinge getoets en aanvaar is.

1.2 Die Algemene Sinode word nie deur enige kerkordelike maatreël verhinder om 'n voorstel oor belydeniswysiging met positiewe aanbeveling of motivering na mindere kerkvergaderinge deur te stuur vir oorweging nie.

1.3 Die Algemene Sinode onderskryf die kerkregtelike beginsel dat 'n nuwe of ander belydenisskrif, naas die reeds aanvaarde belydenisse, sonder dwang maar met belydenisbinding na ondertekening, deur lidmate, ampsdraers en kerkvergaderinge onderskryf kan word.

BEROEPING VAN GELEGITIMEERDES UIT DIE KERKE VAN DIE NG KERKFAMILIE BUIE DIE GRENSE VAN SA NA DIE NG KERK (vgl Agenda A.12 bl 128 pt 9.1.3 en T.14.3 bl 5 pt 5.3.3; Notule Dag 5 pt 12)

Die Algemene Sinode bekragtig die besluit van die Moderamen en neem dit in die funksionele besluite in die Kerkordeboek op.

BRUGBEDIENING: RIGLYNE VIR (vgl Agenda A.14 (Aanvullend bl 51 pt 2.6.3; Notule Dag 4 pt 27)

1 Die Algemene Sinode bevestig dat 'n brugpredikant onderworpe is aan die beroeping en bevestiging as bedienaar van die Woord in 'n vastetermynpos soos omskryf in die Reglement vir Vastetermynposte;

2 Die Algemene Sinode besluit dat riglyne vir brugbediening opgestel behoort te word en versoek die Algemene Bevoegdheidsraad (ABR)/Algemene Taakspan Predikantesake (ATP) om dit te doen.

3 Die Algemene Sinode versoek die ABR/ATP om hierdie riglyne op te neem in die hersiening van die Bestuurshandleiding vir Diensverhoudinge en/of die ABR Handleiding.

BYBELGENOOTSKAP (vgl. Agenda A.4 bl 60 pt 9; Notule Dag 5 pt 24)

1 Die Bybelgenootskap van Suid-Afrika spreek sy groot en opregte dank uit teenoor die leraars, gemeentes, lidmate en akademici van die NG Kerk vir hul besondere en volgehoue ondersteuning van die Bybelgenootskap in gebede, in bydraes, in Bybelvertaling, in die verspreiding van die Bybel, asook waar gedien word op die verskillende beheerliggame van die Bybelgenootskap.

2 Die Algemene Sinode versoek alle gemeentes en lidmate om deur volgehoue gebeds- en finansiële ondersteuning aktief by die verskillende programme van die Bybelgenootskap betrokke te wees. Elke R36 help die Bybelgenootskap om een Bybel bekostigbaar beskikbaar te stel en kan as doelwit per lidmaat per jaar gestel word. Gemeentes word steeds aangemoedig om tydens Pinkster en op Bybelsondag spesiale kollekte vir Bybelverspreiding op te neem.

3 Die Algemene Sinode moedig gemeentes aan om van die Bybelgebaseerde geletterdheidsmateriaal van die Bybelgenootskap gebruik te maak in geletterdheidsprojekte wat gemeentes aanbied.

BYBELGENOOTSKAP: AFRIKAANSE BYBEL 80 JAAR (vgl. Notule Dag 5 pt 24)

Die Algemene Sinode dank die Here vir die Afrikaanse Bybel wat vanjaar 80 jaar oud is.

BYBELGENOOTSKAP: MOSIE DS GERRIT KRITZINGER (vgl Notule Dag 4 pt 17)

Die Algemene Sinode van die Nederduitse Gereformeerde Kerk betuig sy dank aan ds Gerrit Kritzinger vir sy jarelange uitstekende diens as uitvoerende hoof van die Bybelgenootskap. Die Sinode bid hom seënswense toe waar hy aan die einde van 2014 emeriteer.

BYBELVERTALING (vgl Agenda A.4 bl 57 pt 1.4; Notule Dag 5 pt 24)

1 Vordering met die nuwe vertaalprojek (BDV)

Die Algemene Sinode neem met dank kennis van die mate van vordering met die projek vir die bronteksgeoriënteerde vertaling van die Bybel in Afrikaans.

2 Rol van NG Kerk-lidmate

Die Algemene Sinode neem met dank kennis van die groot aantal lidmate wat as teoloë, brontaal- en doeltaalkenners as medewerkers betrokke is by die BDV.

3 Webblad www.bybeldirektevertaling.co.za

Die Algemene Sinode moedig ons lidmate en gemeentes aan om op die BSA se webblad kennis te neem van die projek en sy vordering, asook van enige proefvertalings wat daar bekendgestel word.

4 Hoofletters / kleinletters in Ou-Testamentiese Messiaanse profesieë

Die Algemene Sinode aanvaar die vertalers se vertaling van die Messiaanse tekste in sy Ou-Testamentiese verband en voor die hand liggende betekenis, en dat genoemde tekste met 'n voetnoot gemerk word as verwysend na Christus in die Nuwe Testament. Die Algemene Sinode neem met dank kennis van die wyse waarop die BSA besig is om op baie verantwoordelike wyse met al die kerke wat die Afrikaanse Bybel gebruik, hierdie saak te hanteer.

5 Pogings om die Bybelvertaling te diskrediteer

Die Algemene Sinode neem met dank kennis van die wyse waarop die BSA so wyd moontlik die korrekte inligting in verband met die vertaalprojek aan alle kerke beskikbaar gestel het, en doen 'n beroep op lidmate om hulle nie aan onwaar bewerings oor die vertaalprojek te steur nie, maar om op

die www.bybeldirektevertaling.co.za die korrekte inligting na te gaan. Die Algemene Sinode distansieer hom van die pogings om die BDV te diskrediteer.

6 Finansiële steun vir BDV

Die Algemene Sinode neem met dank daarvan kennis dat die BSA geen direkte bydrae vir die BDV van onderskeie kerke vra nie, maar moedig ons eie lidmate en gemeentes aan om die projek finansiëel te ondersteun.

7 Opdrag

Die Algemene Sinode gee opdrag aan die ATBV om steeds sy volle medewerking aan die BSA te verleen vir hierdie groot projek.

BYBELVERKLARING (vgl Agenda A.4 bl 58 pt 2.4; Notule Dag 5 pt 24)

1 SGB-reeks

Die Algemene Sinode versoek die ATBV om voort te gaan met die *Insig in die Bybel-reeks* en dit tot voltooiing te bring.

2 Dank teenoor Bybelmedia (BM)

Die Algemene Sinode betuig sy opregte dank teenoor Bybelmedia (BM) vir die kreatiewe wyse waarop die voormalige SBG-reeks tans as die *Insig in die Bybel-reeks* bemark word, asook vir die moontlike voortsetting daarvan.

3 Samewerking met die VGKSA

Die Algemene Sinode ondersteun die nouer samewerking met die VGKSA op die terrein van Bybelvertaling en -verklaring.

BYBEL-MEDIA EN MODERAMEN (vgl Notule Dag 5 pt 25)

Die volgende voorstel is nie goedgekeur nie en verwys na die ASM vir hantering:

Die Algemene Sinode word versoek om 'n klein kommissie aan te wys wat met alle betrokkenes by die Kerkbode/Woordfees-kwessie sal praat, en wat dan die kerk met die waarheid aangaande dié saak kan bedien.

BYBEL-MEDIA EN WOORDFEES: SKRYWE VAN DIE RING VAN WYNBERG (vgl Notule Dag 5 pt 25)

Die Algemene Sinode aanvaar die advies van die Tydelike Taakspan Regte dat die skrywe nie ontvanklik is nie.

CLF (vgl Agenda A.8.2 bl 86 pt 6; Notule Dag 5 pt 25)

1 Die Algemene Sinode neem met dank kennis van die werksaamhede van CLF en versoek CLF om daarmee voort te gaan.

2 Die Algemene Sinode dra dit aan die Hugenote Kollege, Bybelmedia en CLF op om wyses te vind en strukture daar te stel om optimale samewerking te bewerkstellig.

DOOPHERINNERING EN DOOPHERDENKING: REDAKSIONELE WYSIGINGS (vgl Agenda A.10.3; Notule Dag 4 pt 10)

Die Algemene Sinode bring die volgende redaksionele wysiginge in die verslag aan:

(1) BI 105 pt 5 vierde *: dat die doop ook nie losgemaak mag word van die eventuele geloof van die gedoopte persoon nie en daarom ten nouste verbind moet word aan 'n proses van geloofsvorming en geloofsgroei;

(2) BI 108 pt 8.3.1 by Inleiding tot die doop

Liturg:

Deur die sakrament van die doop word ons lede van die liggaam van Christus. In die doop bevestig die Drie-Enige God dat Hy homself in Christus aan ons verbind hét en belowe Hy om vir die dopeling 'n God te wees en te seën met al die seëninge van die Evangelie. Die doop is die sigbare teken van hierdie verbintenis. Meer nog, in die doop waarborg die Here aan die dopeling dat al die beloftes van die Evangelie vir hom/haar gegee word. In die doop pleit die Here dat die dopeling Hom sal glo.

Ons ontvang die seën van God se ewige liefde en genade en ons seën die gemeente met ons unieke gawes en ons teenwoordigheid. Ons word gereinig in die doop, deur die waterstroom van sy liefde. Ons word geroep in die doop en word gestuur in die doop om in die krag van die Heilige Gees 'n lewe te leef wat van sy liefde en teenwoordigheid getuig. Ons is vandag hier saam om te bevestig en dit te vier dat klein N vanoggend die teken van die onvoorwaardelike liefde van God vir hom/haar ontvang.

(3) BI 109 pt 8.3.1 by Verbintenis deur ouers

Liturg:

God wag nie vir ons om eerste treë na Hom te gee nie. Hy gee die eerste tree. Ons kinders moet grootword met die wete dat God hulle eerste liefgehad het sodat hulle wil reageer op sy liefde. Julle as doopouers het 'n bepalende rol om hierdie liefde van God aan julle kinders voor te leef. Daarom moet julle as ouers opreg op die volgende vrae antwoord.

Eerstens

Bely julle dat N in Christus aan God behoort en as lidmaat van sy kerk gedoop behoort te word – al het hy/sy ook as sondaar die wêreld ingekom?

Tweedens

Bely julle dat die Bybel, volgens ons kerk se leer (ons leer word in die Belydenisskrifte opgesom), vir ons die ware en volkome pad van die verlossing leer én ons die pad met God verder aanwys?

(4) BI 112 pt 8.3.2 Teken van die kruis / hand in doopvont:

Die teken van die kruis word met die water uit die doopvont op die deelnemer se voorkop of handpalm gemaak.

(5) BI 115 pt 8.3.2 Verbintenis deur die ouers

Liturg:

God wag nie vir ons om eerste treë na Hom te gee nie. Hy gee die eerste tree. Ons kinders moet grootword met die wete dat God hulle eerste liefgehad het sodat hulle wil reageer op sy liefde. Julle as doopouers het 'n bepalende rol om hierdie liefde van God aan julle kinders voor te leef. Daarom moet julle as ouers opreg op die volgende vrae antwoord.

Eerstens

Bely julle dat N in Christus aan God behoort en as lidmaat van sy kerk gedoop behoort te word – al het hy/sy ook as sondaar die wêreld ingekom?

DOOPHERINNERING EN DOOPHERDENKING (vgl Agenda A.10.3 bl 118 pt 9; Notule Dag 4 pt 10)

1 Die Algemene Sinode ontvang die verslag as teologiese standpuntinname oor doop en doopherrinnering/ -herdenking.

2 Die Algemene Sinode beveel die verskillende liturgieë by die kerkverband aan.

3 Die Algemene Sinode moedig gemeentes aan om moeite te doen om die groter geloofsgemeenskap by die doopprosesse in die gemeente te betrek en daarteen te waak om aparte doopdienste te hou.

4 Die Algemene Sinode versoek dat daar in die ontwikkeling van kategesemateriaal na 'n groter geïntegreerdheid tussen doop en belydenisaflegging gekyk sal word.

5 Die Algemene Sinode moedig gemeentes aan om lidmate gereeld kans te gee om op 'n sinvolle wyse hulle doop op verskillende maniere te herdenk.

DOOPHERINNERING EN RITUELE (vgl Agenda B.15 bl 301, A.10.1 bl 90 pt 5.2; Notule Dag 4 pt 10)

1 Hierdie beswaar word verwys na die Taakspan wat werk oor die samehang van die sakramente.

2 Die volgende formulering word aan hierdie taakspan gestuur vir oorweging as reaksie op hierdie beswaarskrif:

2.1 Die Algemene Sinode neem kennis van hierdie beswaar van die gemeente oor doopherrinnering, en gee die gemeente toe op die teologiese beredenering dat die doop en nagmaal nie deur ander geleenthede vervang mag word nie. Tog meen die Sinode dat die beswaar hoofsaaklik gegrond is op 'n interpretasie van 'n woord (“ritueel”) in die besluite wat die bedoeling daarmee ver te bowe gaan. Die formulering het bedoel dat daar toepaslike geleenthede geskep sal word vir viering van die heil in Christus.

2.2 Die Algemene Sinode het begrip daarvoor dat sommige lidmate en gemeentes op teologiese gronde ongemaklik is oor die besluite van die 2011-sinode rondom die erkenning van kerkrade se hantering van doopvieringspraktyke as addisionele geleenthede. Derhalwe wil die Sinode kerkrade opnuut oproep om ondubbelsinnig die regsinnige gereformeerde teologie van die sakramente te leer en in gemeentes te praktiseer.

2.3 Die Algemene Sinode besluit om “dooprituele” te ontmoedig omdat doopherrinnering deel is van elke doopgeleentheid. Lidmate moet leer leef uit hulle doop. Die Algemene Sinode besluit dat oor doop en nagmaal dieper gepreek en nagedink moet word – as viering van die heil in Christus. Die simboliek en eenvoud van die doop en nagmaal moet opnuut ontdek/ervaar word.

2.4 Lidmate wat die behoefte het om groot gedoop te word, of wat hulle reeds laat herdoop het, behoort pastoraal begelei te word om saam te soek na die belewing van die wonderlike genade en heil van God. Leraars behoort meer moeite te doen om in die bediening van die sakramente mense se behoefte aan troos en versekering aan te spreek.

DOOP: UITLEG EN TOEPASSING VAN DIE ALGEMENE SINODE 2011 SE BESLUIE OOR DIE DOOP

(vgl Agenda A.14 (Aanvullend) bl 47 pt 2.1.2; Notule Dag 4 pt 10)

1 Die Algemene Sinode onderskryf die ATR se interpretasie van die Algemene Sinode 2011 se besluite oor die doop.

2 Die Algemene Sinode onderneem om die besluite oor die doop duidelik aan gemeentes te kommunikeer.

EKOLOGIE (vgl Agenda A.12.8 bl 217 pt 2; Notule Dag 5 pt 8)

1 Die Algemene Sinode aanvaar die dokument *Ter wille van die aarde en haar bewoners* as 'n raamwerkdokument.

2 Die Algemene Sinode moedig lidmate, gemeentes, ringe en sinodes aan om in hulle funksionering en bedieninge:

2.1 'n leefwyse van eenvoud te omhels wat minder druk sit op die omgewing en aktief mee te werk aan die ontwikkeling van so 'n leefwyse, eerstens vir onself maar ook vir alle mense.

2.2 temas rondom die omgewing en leefstylverandering deel te maak van die liturgie, kategetiese en ander vorme van gemeenteweese.

2.3 'n profetiese stem te laat hoor ten opsigte van die uitbuiting van natuurlike bronne en praktyke wat klimaatsverandering bevorder.

2.4 ekumenies in gesprek te tree met ander geloofsgroeperinge en nie-regeringsorganisasies ten einde die bewaring van die omgewing te bevorder.

3 Die Algemene Sinode dra dit aan die Taakspan Ekologie op om 'n standpuntinname ten opsigte van hidrobreking te formuleer en via die Moderamen aan die kerkverband deur te gee.

EKONOMIE: STANDPUNTINNAME OOR DIE (vgl Agenda A.12.11 bl 234 pt 2.6.3; Notule Dag 5 pt 3)

Die Algemene Sinode dra dit aan die Moderamen op om dringend 'n omvattende standpuntinname oor die ekonomie te formuleer, aan die sinodes te sirkuleer vir kommentaar en te publiseer. In die opstel van die dokument moet die Moderamen van kundige ekonome en teoloë gebruik maak.

EKUMENE: LIGGAAM VIR KERKE VAN DIE BREËR NG KERKFAMILIE (vgl Agenda A.12.10 bl 221 pt 3.3.3; Notule Dag 3 pt 10)

Die Algemene Sinode besluit om nie 'n nuwe/ afsonderlike liggaam vir die NG Kerkfamilie te vorm nie, maar om die bestaande ekumeniese vergaderings in Afrika te gebruik vir 'n gereelde "Konsultasie van die NG Kerkfamilie".

EKUMENE: TUSSENKERKLIKE RAAD (vgl Agenda A.12.10 bl 222 pt 4.2.6; Notule Dag 3 pt 10)

1 Die besondere verhouding tussen die Nederduitse Gereformeerde Kerk, Nederduitsch Hervormde Kerk van Afrika en die Gereformeerde Kerke in Suid-Afrika, wat vanaf 1958 in die Tussenkerklike Kommissie en sedert 2004 in die Tussenkerklike Raad tot uitdrukking gekom het, het uit 'n gemeenskaplike reformatoriese herkoms, 'n gesamentlike sosio-historiese kontekstualiteit en 'n gemeenskaplike taal gegroei. Ondanks die verskeidenheid in kerkformasie en kerklike etos, asook graadverskille in die belewenis van die gemeenskaplike belydenis, het die kerkgenootskappe deur die jare op grond van 'n gemeenskaplike groeibodem 'n verhouding van geloofseenheid in Christus gehandhaaf.

2 Oortuig daarvan dat ons in Christus een is, is die Nederduitse Gereformeerde Kerk, Nederduitsch Hervormde Kerk van Afrika en die Gereformeerde Kerke in Suid-Afrika verbind tot kerkregtelik-verantwoorde samewerking tussen die drie kerke op bilaterale en/of trilaterale vlak.

3 Die Algemene Sinode aanvaar dat hierdie oortuiging sal uitloop op gestruktureerde samewerking wat kan lei tot gestaltes van eenheid wat bepaalde organisatoriese konsekwensies mag hê.

4 Die Algemene Sinode versoek dat die Tussenkerklike Raad binne bogenoemde uitgangspunt funksioneer en sy grondslag dienooreenkomstig sal wysig met instemming van die bevoegde kerklike vergaderings.

5 Die Algemene Sinode versoek die TKR verder om aandag te gee aan die byeenbring van 'n breër groepering van kerke van die reformasie in 'n "ekumeniese sinode" wat kan dien as ruimte waarin eenheidsgesprekke kan plaasvind/ gefasiliteer word. Die Conventus, wat reeds 'n hele aantal kerke saambring, moet verkieslik hiervoor oorweeg word.

6 Die Algemene Sinode dra dit aan die Moderamen op om die vordering te evalueer. Indien daar geen vordering is nie, moet die Moderamen die Algemene Sinode adviseer oor uittrede uit die TKR.

EKUMENE: EKUMENIESE LIGGAME IN SUID-AFRIKA (vgl Agenda A.12.10 bl 223 pt 4.3.6; Notule Dag 3 pt 10)

Die Algemene Sinode doen 'n ernstige beroep op die bestaande groot ekumeniese liggame om ter wille van die profetiese getuienis van die Kerk van die Here Jesus Christus daadwerklik eenheid in een nasionale ligaam, wat ruimte maak vir diversiteit, te soek.

EKUMENE: CHURCH UNITY COMMISSION (CUC) (vgl Agenda A.12.10 bl 224 pt 4.5.5; Notule Dag 3 pt 10)

Die Algemene Sinode besluit om dit aan die Moderamen op te dra om volle lidmaatskap van die CUC te ondersoek. Indien dit gunstig blyk te wees vir die NG Kerk se ekumeniese rol in Suid-Afrika en die eenheid van die kerk van die Here daadwerklik sal dien, word die Moderamen toestemming verleen om namens die Algemene Sinode lidmaatskap op te neem.

EKUMENE: CRCA (vgl Agenda A.12.10 bl 225 pt 5.2.5; Notule Dag 3 pt 10)

Die Algemene Sinode spreek sy hartseer uit oor die CRCA se verbreking van bande met die WCRC. Die Algemene Sinode versoek 'n pastorale gesprek met die CRCA in die verband ten einde vas te stel wat die besluit beteken vir die verhouding met die NG Kerk.

EKUMENE: PKN (vgl Agenda A.12.10 bl 226 pt 5.8.8; Notule Dag 3 pt 10)

1 Die Algemene Sinode boekstaaf sy vreugde en dankbaarheid oor die verwickelinge tov die PKN.
2 Die Algemene Sinode dra dit aan die Moderamen op om alles moontlik te doen om die ekumeniese verhouding so gou as moontlik op 'n vaste voet te kry.

EKUMENE: VERENIGDE PROTESTANTSE KERK IN BELGIË (vgl A.12.10 bl 226 pt 5.9.6; T.14.3 bl 8 pt 7.1.2; Notule Dag 3 pt 10)

1 Die Algemene Sinode keur Aanbeveling 5.9.6 (Agenda bladsy 226) met 'n gewone meerderheidstem goed: Die Algemene Sinode besluit om itv KO Art 70 en Reglement 20 ekumeniese bande met die VPKB aan te gaan.
2 Die Algemene Sinode besluit om die Verenigende Protestantse Kerk in België se naam by te voeg by 4.7.2.2 van die Reglement vir die Verhoudinge tot Ander Kerke en Groepe, en wel by die kerke met wie die NG Kerk in gedeeltelike verhouding staan.

EKUMENE: GKSA EN NG KERK (vgl A.12.10 bl 228 pt 7.1.5; Notule Dag 3 pt 10)

1 Die Algemene Sinode neem met spyt kennis van die besluit van die Algemene Sinode van die GKSA om nie 'n bilaterale ooreenkoms met die NG Kerk te onderteken nie.
2 Die Algemene Sinode dra dit aan die Moderamen op om die gesprek met die GKSA na 'n punt te neem.

EKUMENE: CALVYN PROTESTANTSE KERK (vgl A.12.10 bl 229 pt 7.4.4, T.14.3 bl 8 pt 7.2.2; Notule Dag 3 pt 10)

1 Die Algemene Sinode keur Aanbeveling 7.4.4 (Agenda bladsy 229) met 'n gewone meerderheidstem goed: Die Algemene Sinode besluit om itv KO Art 70 en Reglement 20 ekumeniese bande met die CPK aan te gaan.
2 Die Algemene Sinode besluit om die Calvyn Protestantse Kerk se naam by te voeg by 4.7.2.2 van die Reglement vir die Verhoudinge tot Ander Kerke en Groepe, en wel by die kerke met wie die NG Kerk in gedeeltelike verhouding staan.

EKUMENE: VOLKSKERK VAN AFRIKA (vgl Agenda A.12.10 bl 229 pt 7.5.4, T.14.3 bl 8 pt 7.3.2; Notule Dag 3 pt 10)

1 Die Algemene Sinode keur Aanbeveling 7.5.4 (Agenda bladsy 229) met 'n gewone meerderheidstem goed: Die Algemene Sinode besluit om itv KO Art 70 en Reglement 20 ekumeniese bande met die Volkskerk van Afrika aan te gaan.
2 Die Algemene Sinode besluit om die Volkskerk van Afrika se naam by te voeg by 4.7.2.2 van die Reglement vir die Verhoudinge tot Ander Kerke en Groepe, en wel by die kerke met wie die NG Kerk in gedeeltelike verhouding staan.

EKUMENIESE VERHOUDINGE: MOSIE (vgl Notule Dag 5 pt 13)

Die Algemene Sinode bedank dr Kobus Gerber vir sy ywer om die ekumeniese verhoudinge van die NG Kerk uit te brei en tot op die beste punt ooit te bring, asook dr Johan Botha vir sy werk tov die verhoudinge met die NG Kerkfamilie in Afrika.

FONDSE EN BATES: FINANSIËLE BESTUURSBENADERING (vgl Agenda A.6 (Aanvullend) bl 5 pt 3.2; Notule Dag 3 pt 14)

Die Algemene Sinode keur die Finansiële Bestuursbenadering goed.

FONDSE EN BATES: BELEGGINGSPORTEFEULJE (vgl Agenda A.6 (Aanvullend) bl 7 pt 7.2; Notule Dag 3 pt 14)

Die Algemene Sinode herbevestig die mandaat dat die ATF die verantwoordelikheid het om sy beleggingsportefeulje deurlopend te beskerm deur te verseker dat die nodige maatreëls in plek is.

FONDSE EN BATES: STAND VAN SAKE IN STREEKSINODES (vgl Agenda A.6 (Aanvullend) bl 7 pt 6; Notule Dag 3 pt 14)

Die Algemene Sinode neem kennis van die stand van sake in die streeksinodes.

FONDSE EN BATES: VOORSTELLE EN AANBEVELINGS WAT FINANSIËLE IMPLIKASIES HET (vgl Agenda A.6 (Aanvullend) bl 7 pt 8; Notule Dag 3 pt 14)

Die Algemene Sinode besluit dat alle voorstelle wat 'n finansiële implikasie het, eers na die Tydelike Taakspan Fondse verwys word.

FONDSE EN BATES: BESKIKBAARHEID VAN FONDSE (vgl Notule Dag 4 pt 24)

Die Algemene Sinode besluit dat die Algemene Steunspan Fondse wanneer die begroting opgestel is en indien daar 'n tekort ontstaan met die Sinodes kan onderhandel om die bydrae van 0.28% te verhoog na 0.30%.

GEESTELIKE WERKERS: BEVOEGDHEID VAN (vgl Agenda A.14 bl 256 pt 6.2; Notule Dag 3 pt 17)

Die Algemene Sinode bekragtig die wysiging en besluit dat dit so opgeneem word in die Kerkorde 2013 onder die Funkionele Besluite.

GEKWALIFISEERDE LEGITIMASIE NAMIBIË (vgl Agenda A.3 (Aanvullend) bl 2 pt 1.4; Notule Dag 5 pt 15)

1 Die Algemene Sinode neem kennis van die persone wat deur die Namibiese Sinode 'n Akte van Gekwalifiseerde Legitimasie ontvang het.

2 Die Algemene Sinode keur die optrede van die Namibiese Sinode goed.

GELOOFSWAARHEDE (vgl Agenda A.10.1 bl 90 pt 4.2, B.27 bl 320; Notule Dag 4 pt 15)

1 Die Algemene Sinode herbevestig weereens die NG Kerk se standpunt oor die gesag van die Woord van God as enigste norm vir ons geloof.

2 Die Algemene Sinode herbevestig weereens dat die NG Kerk die belydenisskrifte sien as normatief in die sin dat dit volgens die Skrif ons geloof bely.

3 Die Algemene Sinode herbevestig dat die Skrif en Belydenis gelees moet word binne hulle historiese konteks en dat hulle met verantwoorde hermeneutiek vertolk sal word, sodat ons die leiding van die Gees vir ons tyd kan hoor.

4 Die Algemene Sinode wys lidmate daarop dat ons met mekaar in gesprek sal tree voordat mense verdag gemaak word, of van leerdwaling beskuldig word, want verdagmaking en leuens is net soveel sonde as leerdwaling.

5 Die Sinode besef dat baie lidmate geweldige onsekerhede op baie vlakke beleef en wil lidmate verseker van deernis met hulle situasie. Die Sinode wil ook lidmate en leraars daarop wys dat, juis wat ons van die Bybel en Belydenisskrifte as antwoord hierop glo, ons weerhou van fundamentalisme (aan die een kant) en vrysinnigheid/radikale sekularisme (aan die ander kant).

GRONDHERVORMING EN LANDELIKE ONTWIKKELING (Vgl Agenda A.12.11.2 bl 243 pt 1.3; Notule Dag 5 pt 9)

1 Die Algemene Sinode herhaal sy opdrag van 2011 aan die Taakspan Grondhervorming en Landelike Ontwikkeling en versoek die Taakspan om in besonder uitvoering te gee aan die sake wat in 1.2.1 tot 1.2.8 (A.12.11.2) genoem word.

2 Die Taakspan word versoek om met die ASM in gesprek te tree oor die nodige kapasiteit en bemagtiging om bogenoemde moontlik te maak.

GRONDHERVORMING, LANDELIKE ONTWIKKELING EN LANDBOU (vgl Agenda A.12.11.2 bl 248 pt 5; Notule Dag 5 pt 9)

1 Die Algemene Sinode versoek die Moderamen om binne die raamwerk van die verslag voort te gaan om op so veel as moontlike vlakke versoening en sinvolle oplossings te bemiddel.

2 Die Algemene Sinode verwys die verslag na die onderskeie sinodes om dit na goeie denke en binne konteks op die tafel van gemeentes te plaas, in die hoop dat dit die NG Kerk se sinvolle bydrae op voetsoolvlak/gemeentevlak sal verhoog.

3 Die Algemene Sinode versoek die Moderamen om, as NG Kerkfamilie en ekumeniese vennote, die aangeleethede in die verslag waaroor ernstige kommer heers dringend met die Nasionale Regering op te neem.

4 Die Algemene Sinode is diep verontrus oor die morele verval in die land, maar veral binne die landbousektor (kyk Agenda bl 246 pt 4.6.1.4). Dit behoort as 'n prioriteit binne die NG Kerkfamilie hanteer te word – met 'n duidelik geformuleerde uitkomsgebaseerde omkeer-strategie.

5 Die Algemene Sinode is diep verontrus oor die impak wat veral bogrondse mynbedrywighede in sekere vrugbare dele van die land op die landbou en die omgewing het en doen 'n beroep op die regering om deur streng wetstoepassing en volhoubare gemeenskapsontwikkeling 'n einde daaraan te maak.

6 Die Algemene Sinode doen 'n beroep op lidmate in die landbousektor om die gesins- en familielewe van hulle werkers te koester, hulle onderwys te verseker en kerklik met hulle mee te leef.

7 Die Algemene Sinode versoek sy Taakspan vir Ekologie om die Moderamen dringend met advies oor hidrobreking te voorsien met die oog op standpuntformulering.

GEREFORMEERDE HERMENEUTIEK (vgl Notule Dag 4 pt 18)

1. In die lig van al die onderwerpe wat gedien het by Leerstellige- en Aktuele Sake by die Algemene Sinode van 2013 is die behoefte baie duidelik identifiseer aan 'n indringende gereformeerde hermeneutiek wat verantwoordbaar en prakties toepaslik is.

2. In die lig van ons luisterproses besluit die Algemene Sinode dat die Algemene Taakspan vir Leerstellige en Aktuele Sake bruikbare materiaal (Bybelstudiemateriaal) uitbring met praktiese voorbeelde aangaande die lees, verstaan en vertolking van Skrif en belydenisskrifte ten opsigte van leer- en etiese sake.

3. Die bestaande besluite van die kerk oor Skrifgesag en Skrifgebruik en vertolking van belydenisskrifte moet daarin gereflekteer word.

4. Dit moet aan elke sinode beskikbaar gestel word vir bespreking en gesprekvoering.

HEIDELBERGSE KATEGISMUS (vgl Notule Dag 4 pt 26)

Die Algemene Sinode versoek die Kerkbode om 'n spesiale feesuitgawe te publiseer om die 450-jarige herdenking van die Heidelbergse Kategismus te vier.

HOMOSEKSUALITEIT: PROSESVOORSTEL TOV DIE VOORTGESETTE GESPREK OOR (vgl Agenda A.12 bl 128 pt 9.3; A.12 (Aanvullend) bl 24; Notule Dag 5 pt 4)

Die Algemene Sinode vervang A.12 (Aanvullend) bl 24 pt 1.5 met die volgende:

Die Algemene Sinode

1.5.1 bevestig dat die besluit van 2007 oor homoseksualiteit geneem is na 'n deeglike eksegetiese en teologiese studie.

1.5.2 gee opdrag aan die ASM om in voortsetting van die 2007 verslag oor homoseksualiteit 'n studie te doen oor die status van selfdegeslagverhoudings in die lig van die Skrif en Gereformeerde tradisie

1.5.3 besluit dat homoseksuele en heteroseksuele studente wat hulle voorberei vir die bediening in die NG Kerk, aan dieselfde Christelik-etiese standarde moet voldoen met die oog op legitimasie.

1.5.4 verbind hom ook in die hantering van die saak aan die waardes van die Seisoen van Menswaardigheid.

HUGENOTE KOLLEGE: ALGEMENE KURATORIUM (vgl Agenda T.14.1 bl 4 pt 3.1.3 ; Notule Dag 2 pt 35)

1 Die Algemene Sinode neem kennis van Aanbeveling 11 op bladsy 280 van die Agenda.

2 Die Algemene Sinode versoek die Algemene Kuratorium om die eersvolgende Algemene Sinode te adviseer oor gesamentlike teologiese opleiding vir lidkerke van die NG Kerkfamilie aan die Hugenote Kollege in Wellington.

3 Die Algemene Sinode bevestig dat die vergunning wat Hugenote Kollege tans het om 'n verteenwoordiger op eie koste met adviserende stem te stuur na die vergaderinge van die Algemene Kuratorium, steeds voortgesit word tot by die volgende Algemene Sinode.

INLIGTINGSWET (vgl Agenda T.14.2 bl 4 pt 2.4.1.1, A.3 bl 29 pt 5.5; Notule Dag 3 pt 15)

1 Die Algemene Sinode wys – vir die doeleindes van Wet 2 van 2000 – die Saakgelastigde van die NG Kerk in SA (ds AH Minnaar), synde die PSD vir die Argief te wees, aan as die “Inligtingsbeampte van die Algemene Sinode van die NG Kerk”.

2 Die Algemene Sinode versoek sinodes (met uitsondering van Namibië) om al hulle binnelandse gemeentes, ringe, kerklike instansies en kantore gereeld te versoek om as 'n saak van dringendheid uitvoering te gee aan die vereistes van Wet 2 van 2000.

JEUGNAVORSING (vgl Agenda A.7.3 bl 79 pt 5; Notule Dag 2 pt 19)

1 Die Algemene Sinode keur goed dat die navorsing soos beplan, voortgaan.

2 Die Algemene Sinode versoek gemeentes wat genader word om deel te neem aan die navorsing om dit as 'n saak van prioriteit en belangrikheid te sien. Gemeentes word versoek om hul samewerking in die verband te gee.

3 Die Algemene Sinode bevestig die belangrikheid van die bediening aan jongmense in die kerk. Die Algemene Sinode dra dit aan die ASM op om seker te maak dat moontlike strukture, bedieningsmoontlikhede en verdere projekte wat deur die navorsing ter tafel kom as prioriteit, met befondsing, aandag sal geniet op Algemene Sinodale vlak.

4 Die Algemene Sinode spreek sy waardering uit teenoor ander kerke en denominasies wat saam met die NG Kerk aan hierdie projek deelneem.

JEUGBEDIENING IN DIE NG KERK (vgl Agenda A.12 (Aanvullend) bl 25 pt 2.4; Notule Dag 2 pt 25)

1 Die Algemene Sinode neem met kommer kennis van die situasie tov die NG Kerk se jeugbediening.

2 Die Algemene Sinode versoek die sinodes dringend om hulle samewerking te gee tot en fondse beskikbaar te stel vir 'n Netwerk: Jeugbediening (soos vir Klein Gemeentes en Lidmaatbemagtiging) ten einde sinodes en mettertyd die Moderamen/ Algemene Sinode te adviseer.

JEUG: AFRONDINGSJAAR (vgl Agenda A.12.11.1 bl 240 pt 3.7; Notule Dag 2 pt 31)

1 Die Algemene Sinode keur die implementering van 'n afrondingsjaar goed.

2 Sinodes word versoek om die ontwikkeling en implementering van 'n afrondingsjaar te ondersoek.

3 Sinodes word verder versoek om as alternatief op die ontwikkeling en implementering van 'n eie afrondingsjaar Ritmejaar te ondersteun en te propageer.

JEUG: WATER-PROGRAM (vgl Agenda A.12.11.1 bl 239 pt 2.6; Notule dag 2 pt 36)

1 Die Algemene Sinode keur die ontwikkeling en implementering van die Water-program goed.

2 Die Sinode begroot vir die ontwikkeling en implementering van die Water-program.

3 Die Sinode versoek sinodes om elk 'n verteenwoordiger te benoem om op die taakspan te dien.

JEUG: DEELNAME VAN WAARNEMERS VANUIT VERSKILLENDE SINODES (vgl Notule Dag 5 pt 20)

Daar is baie min verteenwoordiging by die Algemene Sinode van persone tussen die ouderdom 20-32 jaar. Tog is dit belangrik dat ons hierdie jong afgevaardigdes hoor en saam met hulle na God luister. Dus die volgende voorstel: Elke sinode kies 'n afgevaardigde uit hierdie ouderdomsgroep wat die volgende Algemene Sinode as waarnemers bywoon om die prosedures en ander fasette van die werking van die vergadering te leer ken.

KATEGESE (vgl Agenda A.7.1 bl 74 pt 6; Notule Dag 2 pt 29)

1 Die Algemene Sinode oordeel steeds dat Kategese as 'n prioriteit van die Algemene Sinode beskou moet word.

2 Die Algemene Sinode wys 'n Projekspan aan om navorsing te doen, voorligting te gee en eietydse, relevante materiaal en ander hulpmiddels binne die raam van die gereformeerde teologie en belydenisskrifte van die NG Kerk te ontwikkel.

KATEGESE: BELYDENISAFLEGGING (vgl Agenda A.7.2 bl 76 pt 4; Notule Dag 2 pt 29)

Ten einde die opdrag uit te voer, keur die Algemene Sinode die volgende proses in drie fases goed:

1 BESINNING

1.1 Bestaande verslae, uitgangspunte en besluite moet herbesoek word. Hiervoor is dit nodig dat besinning wat reeds aan die gang is by ATLAS en die Projekspan Kategese gekoördineer moet word.

1.2 Daar moet besin word of belydenisaflegging die regte woordkeuse is in die lig van kinders wat reeds hulle geloof bely om deel te mag hê aan die nagmaal.

1.3 Daar moet besin word oor die mylpale wat belydenisaflegging vooraf gaan en die mylpale wat belydenisaflegging opvolg.

2 VESTIGING VAN BEDIENINGSHOUDING

Uit bogenoemde besinning word sekere gevolgtrekkings gemaak oor die aard, die plek en die rol van belydenisaflegging in die geloofsreis, maar ook in die beleving van lidmaatskap in die kerk en burgerskap van die koninkryk.

3 VESTIGING VAN BEDIENINGSTYL

3.1 Die bedieningshouding wat gegroei het uit die besinning vloei dan oor in 'n bepaalde bedieningstyl. Hierdie bedieningstyl vestig dan sekere rituele en simbole wat van belydenisaflegging 'n mylpaal maak wat geloofsgroei in die hand werk. Belydenisaflegging word dus slegs een van die mylpale op die geloofsreis en nie die enigste mylpaal nie.

3.2 Belydenisaflegging word dan 'n mylpaal waarop daar telkens weer deur die lidmaat en die kerk gereflekteer word (besinning). En so bly hierdie 'n oop proses wat aanhou.

4 PROJEKSPAN

4.1 Ten einde hierdie proses te bestuur, word die volgende Projekspan saamgestel:

***1 Besinning oor die Kerkorde: dr Johan van der Merwe en dr Paul du Plessis;**

***2 Besinning oor die leer rakende toesegging van heil, toe-eining van heil en die uitleef van verantwoordelikhede: dr Andries Kritzinger;**

***3 Besinning oor bestaande gespreksdokumente: ds Johan Avenant;**

***4 Besinning van die jongmense se belewenisse: di Fouche de Wet en Danie Vermaak;**

***5 Sameroeper: ds Tienie Bosman.**

4.2 Die Algemene Sinode begroot vir die werksaamhede van die Projekspan.

KERKHERENIGING (vgl Agenda A.12 3 bl 152 pt 7, T.12.3.1 bl 1 pt 3; vgl ook T.14.2 bl 4-5 pte 3.1.1 en 3.2.1 tov 3.2 en 3.3; Notule Dag 3 pt 9)

1 Die Algemene Sinode is dankbaar oor die vordering in die gesprek en verhouding met die VGKSA en onderskryf die werk van die Moderamen in die verband.

2 Die Algemene Sinode keur die Memorandum van Ooreenkoms met die VGKSA goed onderhewig daaraan dat dit kerkordelik en regtens haalbaar is.

3 Die Algemene Sinode keur die roetekaart vir 'n kerkherenigingsproses goed onderhewig daaraan dat dit kerkordelik en regtens haalbaar is.

4 Die Algemene Sinode bevestig dat sinodes, ringe en gemeentes hulle selfstandigheid en verantwoordelikheid ten opsigte van besluitneming en bedieningstrukture in 'n nuwe kerkverband mag behou.

5 Die Algemene Sinode keur die beoogde Algemene Predikantekonferensie goed en versoek die kerkverband om dit moontlik te maak vir leraars om teenwoordig te wees.

6 Die Algemene Sinode keur die daarstel van 'n Loodskomitee vir Kerkhereniging en 'n Taakspan vir 'n Tussenorde en Konsepkerkorde goed, en dra die samestelling daarvan aan die moderamen op.

7 Die Algemene Sinode spreek weereens sy wens uit dat al vier kerke van die NG Kerkfamilie in een kerkverband moet tuiskom en dra dit aan die Moderamen op om in die onderhandelinge met die VGKSA asook die NGKA en die RCA alles moontlik te doen om dit moontlik te maak.

KERKHERENIGING (vgl Agenda B.23 bl 313, T.14.4 bl 7 pt 9.1; Notule Dag 5 pt 19)

Die Algemene Sinode neem kennis van die Beskrywingspunt en verwys dit na die ATR.

KERKLIKE "DIENSWERKERS" (vgl Agenda A.15.1 bl 268 pt 10.4.2.2; Notule Dag 2 pt 35)

Die tweede sin van 10.4.2.2 word soos volg gewysig: "Hulle word deur die gemeente bevestig as ouderlinge of diakens."

KERKLIKE "DIENSWERKERS" (vgl Agenda A.15.1 bl 268 pt 10.4.3; Notule Dag 2 pt 35)

1 Die Algemene Sinode keur die akkreditering van kerklike dienswerkers goed.

2 Die Algemene Sinode verwys dit na die Algemene Kuratorium om verder te besin oor die aard van toepaslike akkreditering. Die Algemene Kuratorium tree met die Algemene Bevoegdheidsraad in gesprek oor die erkenning van hierdie akkreditering en doen verslag aan die ASM met die oog op afhandeling en implementering.

KERKORDE: HERSIENING VAN DIE (vgl Agenda A.14 bl 257 pt 8.2; Notule Dag 3 pt 17)

Die Algemene Sinode keur die reëling van die ATR goed dat persone wat wysiginge aan die Kerkorde wil bespreek die Tydelike Taakspan Regte voor die behandeling van die ATR-verslag ontmoet.

LANDSWETTE VAN TOEPASSING OP GEMEENTES/DIE KERKVERBAND (vgl Agenda A.14 (Aanvullend) bl 50 pt 2.2.1; Notule Dag 4 pt 27)

Die Algemene Sinode versoek die ATR om die landswette wat op gemeentes/die kerkverband van toepassing is, na te gaan en die kerkverband te adviseer oor die toepassing daarvan.

LEERSTELLIGE EN AKTUELE SAKE: TAAKSPAN (vgl T.14.3 bl 5 pt 5.2.4.1; Notule Dag 5 pt 12)

1 Die Algemene Sinode dra dit aan die Moderamen op om 'n projekspan(ne) saam te stel om uitvoering te gee aan die strategiese prioriteite van die Algemene Sinode op leerstellige en aktuele sake-gebied. Die Moderamen besluit oor die omskrywing van die taakopdrag.

2 Die Algemene Sinode neem kennis van Aanbeveling 6.1.5 op bladsy 126 van die Agenda.

LIDMAATBEMAGTIGING (vgl Agenda A.11.1 bl 121 pt 6; Notule Dag 2 pt 28)

1 Die Algemene Sinode aanvaar Lidmaatbemaatiging, wat besin oor die gestuurdheid, dissipelskap en toerusting van lidmate, as 'n kontinue werksaamheid.

2 Die Algemene Sinode versoek die Netwerk vir Lidmaatbemaatiging om navorsing te doen en te besin oor gestuurdheid, dissipelskap, toerusting en dienswerk van gelowiges en die studieresultate beskikbaar te stel sodat dit die kerk en haar missionale roeping kan ondersteun.

3 Die Netwerk word uitgebrei met verteenwoordigers van die NG Kerkfamilie.

4 Die Algemene Sinode vestig 'n netwerk vir erediens en liturgie om die Algemene Sinode te adviseer.

5 Die Algemene Sinode vestig 'n netwerk vir gemeentebediening om die Algemene Sinode te adviseer.

MAATSKAPPYE EN REGSENTITEITE (vgl Agenda A.12.2 bl 142 pt 9; Notule Dag 5 pt 21)

1 Die Algemene Sinode keur die optrede van die Bestuurspan van die Moderamen rakende die kerklike maatskappye en die ander regsentiteite goed.

2 Die Algemene Sinode versoek die ATF om in oorleg met die ATR die Reglement vir Eiendomme, Goedere en Fondse indringend te hersien en toepaslike besluite van die Algemene Sinode rakende die oprigting, beheer en bestuur van kerklike maatskappye en ander regsentiteite, asook die vereistes van tersaaklike wetgewing, daarin op te neem.

3 Die Algemene Sinode herbevestig dat die Christelike Lektuurfonds 'n "trustfonds" van die Algemene Sinode is en dat die Algemene Sinode/Moderamen die finale seggenskap het oor die bestuur en aanwending van die Fonds ooreenkomstig die regsgeïndigde-goedgekeurde Reglement.

4 Die Algemene Sinode versoek sinodes om vóór 28 Februarie 2014 aan die ATF en Moderamen verslag te doen oor die eiendomme, goedere en fondse

4.1 wat verband gehou het met die werksaamhede van die ontbinde "Gefedereerde NG Kerke" en/of die Raad van die Kerke en/of enige van die ander gefedereerde liggame (soos die Federale Sendingraad, die Federale Armsorgraad, die Gefedereerde Sondagskoolkommissie, ens.) en vanaf 1962 deur die betrokke sinodes vir die Algemene Sinode "in trust" gehou moes word, en/of

4.2 waarvan die skenkingsakte/testament/reglement die "Gefedereerde NG Kerke", die Raad van die Kerke of enige van die ander gefedereerde liggame as begunstigde aanwys.

5 Die Algemene Sinode bevestig dat met die ontbinding van die Kerklike Jeugvereniging (KJV) op nasionale vlak in 1975, alle magte en bevoegdhede in terme van Artikel 55 van die Kerkorde na die Algemene Sinode as regs persoon oorgegaan het en dat die Algemene Jeugkommissie (AJK) die gemagtigde orgaan van die Algemene Sinode as regs persoon geword het.

6 Die Algemene Sinode bevestig dat met die ontbinding van die Algemene Jeugkommissie volgens besluit van die Algemene Sinode in 2004, die Algemene Diensgroep Gemeente-ontwikkeling (ADGO) die gemagtigde orgaan van Algemene Sinode as regs persoon geword het.

7 Die Algemene Sinode bevestig dat met die ontbinding van die Algemene Sinodale Sendingkommissie (ASSK) én die Algemene Kommissie vir Diens van Barmhartigheid (AKDB) volgens besluit van die Algemene Sinode in 2004, die Algemene Diensgroep Diensgetuieis (ADD) die gemagtigde orgaan van die Algemene Sinode as regs persoon geword het.

8 Die Algemene Sinode bevestig dat met die ontbinding van die Algemene Diensgroep Gemeente-ontwikkeling (ADGO) én die Algemene Diensgroep Diensgetuieis (ADD), die Algemene Sinodale Moderamen die gemagtigde orgaan van die Algemene Sinode as regs persoon geword het.

MAATSKAPPYE: POSISIONERING EN ROL VAN KERKLIKE MAATSKAPPYE (vgl Agenda A.12.2 bl 146 pt 4, T.14.3 bl 7 pt 6.3.1; Notule Dag 5 pt 21)

1 Die Algemene Sinode keur die optrede van die Projekspan ivm die Posisionering en Rol van kerklike Maatskappye goed.

2 Die Algemene Sinode keur die Memorandum van Ooreenkoms tussen die Algemene Sinode, die Christelike Lektuurfonds, Bybel-Media en Hugenote Kollege, na voorlegging tydens die Algemene Sinode, goed:

MEMORANDUM VAN OOREENKOMS

tussen die Algemene Sinode van die NG Kerk, die Christelike Lektuurfonds, Bybel-Media en die Hugenote Kollege

1. INLEIDING/AGTERGROND

Die projekspan ivm die posisionering en rol van kerklike maatskappye, bestaande uit twee lede van elk van die vier partye (Moderamen van die Algemene Sinode, Christelike Lektuurfonds, Bybel-Media en Hugenote Kollege) en onder voorsitterskap van die Moderamen, het reeds vier keer vergader. Die opdrag aan die span was om ondersoek in te stel na 'n proses om fokusse en werksaamhede te bely en waar moontlik te integreer. Tydens die vergadering in Wellington by Bybel-Media het die

lede ooreengekom oor die noodsaaklikheid van 'n Memorandum van Ooreenkoms wat die partye genoegsaam sal bind tot verdere gesamentlike optrede.

2. OOREENKOMS

2.1 Die Nederduitse Gereformeerde Kerk (NG Kerk), Christelike Lektuurfonds (CLF), Bybel-Media (BM) en Hugenate Kollege (HK) verbind hulle hiermee formeel onderling, en tussen die Moderamen van die NG Kerk en die entiteite, tot die optimale belyning en moontlike integrasie van fokusse en werksaamhede op die terrein van kerklike media en opleiding.

2.2 Ons verbind onself verder tot 'n proses wat sal uitloop op 'n optimale benutting van bestaande hulpbronne, die handhawing van sinergieë tussen die entiteite, die bepaling van gesamentlike strategieë, die fasilitering van bestuur, en bedryfsamewerking op operasionele vlak.

2.3 As prioriteit verbind ons ons tot die onmiddellike ondersoek na die daarstelling van 'n gestruktureerde koördineringspan of forum soos ooreengekom tydens die vergadering van die betrokke partye op 1 Augustus 2013 te Wellington. Indien goedgekeur deur die Moderamen, die direksies van BM en HK, en die beheerraad van CLF sal die koördineringspan die verdere belyning van werksaamhede ondersoek en fasiliteer. Ingeslote hierby sal daar 'n ondersoek wees na die moontlike skep van 'n groep- of houermaatskappy.

2.4 Gereelde terugvoer aan die Bedryfspan, die direksies van die HK en BM asook die beheerraad van CLF sal gehandhaaf word.

2.5 Bestaande en toekomstige verbintenisse en ooreenkomste met ander familiekerke tov mediabedrywe sal gerespekteer word, asook die historiese en gevestigde werksaamhede van die verskeie partye tot hierdie ooreenkoms. Veranderinge sal oor tyd ingefaseer moet word.

2.6 Daar sal deeglik besin word oor die inhoud van en die implikasies vir die praktyk van die aanvaarding van die missionale ekklesiologieverslag wat voor die 2013 Algemene Sinode dien.

3. WAARDES

Ons verbind ons tot toepaslike korporatiewe waardes in verdere onderhandelings tussen die partye in die ooreenkoms vermeld.

3 Die Algemene Sinode gee aan die Algemene Taakspan Regte opdrag om onverwyld 'n gesaghebbende regsmenting te verkry oor die regs aanspreeklikheidsgevolge wat die nuwe Maatskappywet vir die kerk kan hê indien kerkvergaderinge die ledevergadering vorm of die lede vir die ledevergadering benoem wat daarop die direkteure/beheerraadslede vir die regsentiteit(e) aanwys.

4 Die Algemene Sinode keur op grond van die Struktureringsverslag die totstandkoming van die strategiese Projekspan Kerklike Media goed.

5 Die Algemene Sinode keur die onderstaande samestelling en opdrag vir die strategiese Projekspan Kerklike Media goed:

PROJEKSPAN KERKLIKE MEDIA

1. SAMESTELLING

Die Projekspan se samestelling is:

1.1 Een lid van die Moderamen deur die Moderamen van die Algemene Sinode aangewys met sekundus;

1.2 Twee lede van die Bedryfspan deur die Moderamen van die Algemene Sinode aangewys met sekundi.

1.3 Twee lede deur die Direksie van Bybel-Media aangewys met sekundi.

1.4 Twee lede deur die Direksie van Hugenate Kollege aangewys met sekundi.

1.5 Twee lede deur die Beheerraad van Christelike Lektuurfonds aangewys met sekundi.

1.6 Elke ander lidkerk van die NG Kerkfamilie kan op eie koste een verteenwoordiger met sekundus aanwys.

1.7 Die Moderamen wys, op aanbeveling van die Projekspan, die projekteier aan.

2. OPDRAG

Die Projekspan se opdrag is:

- 2.1 die belyning van die werksaamhede van die media- en opleidingsentiteite van die NG Kerk/NG Kerkfamilie met die strategiese doelwitte van die Algemene Sinode van die NG Kerk en die gesamentlike werksaamhede van die NG Kerkfamilie;
- 2.2 die versekering van die optimale benutting van bestaande hulpbronne, die handhawing van sinergie binne en tussen die entiteite, die bepaling van gesamentlike strategië, die fasilitering van bestuur- en bedryfsamewerking op operasionele vlak en die bevordering van die integrasie van fokus en werksaamhede waar enigsins moontlik;
- 2.3 ondersoek na die moontlike skep van 'n groep- of houermaatskappy, of die moontlike omskepping van 'n bestaande maatskappy daartoe, sodat 'n enkele gesagvolle kontakpunt tussen al die media- en opleidingsentiteite en die Algemene Sinode gevestig en verder ontwikkel kan word;
- 2.4 ondersoek na die moontlike skep van 'n enkele ledevergadering waarin verteenwoordigers van die die NG Kerk of die NG Kerkfamilie kan saamkom, waar saam met al die direkteure/ beheerraadslede van die entiteite besin kan word oor sake van gemeenskaplike belang en die gesamentlike belyning van strategië en doelwitte en waaruit direk aan die kerk(e) gerapporteer kan word oor die sake van die groep en die onderskeie entiteite;
- 2.5 gereelde tussentydse verslagdoening aan die Moderamen, die Direksie van Bybel-Media, die Direksie van Hugenote Kollege en die Beheerraad van Christelike Lektuurfonds; en
- 2.6 finale verslagdoening aan die Algemene Sinode.

3. KONSTITUERING

Die Projekspan konstitueer so gou moontlik na die vergadering van die Algemene Sinode van die NG Kerk onder leiding van die Algemene Sekretaris van die Algemene Sinode.

4. VERGADERINGS

Die Projekspan vergader so dikwels as nodig, maar minstens een keer per jaar.

5. PROJEKONDERSTEUNING

5.1 Die Bedryfspan, Steundienste en die kantoor van die Algemene Sinode lewer operasionele ondersteuning aan die Projekspan.

5.2 Die Algemene Steunspan Fondse en Bates begroot vir die werksaamhede van die Projekspan.

6. ONTBINDING

Sodra die werksaamhede van die Projekspan in 'n permanente struktuur gevestig is en alle opdragte aan die Projekspan afgehandel is, vind ontbinding plaas.

MEDIA-POLEMIEK (vgl Notule Dag 5 pt 18)

1. Die Algemene Sinode neem met sorg kennis van 'n groeiende tendens dat lidmate en leraars wat vanuit hulle persoonlike perspektiewe en oortuigings verskil met kerklike prosesse, besluite, uitsprake, benaderings en ampsdraers, kies om elektroniese kommunikasie en publieke forums te gebruik om veldtogte van verdagmaking, beskuldiging en selfs karakterskending te loots.
2. Terwyl die Algemene Sinode verbind bly tot openhartige publieke gespreke, betreur ons dit dat sommige van hierdie persone met sodanige veldtogte nie skroom om afbrekend, vervolgend en negatief te wees en selfs vergaderings en mede-gelowiges se integriteit af te kraak nie. Sodoende is en word mede-gelowiges diep seergemaak en die Liggaam van Christus leed aangedoen.
3. Omdat die Algemene Sinode begrip het daarvoor dat daar altyd uiteenlopende perspektiewe en verskille in die kerk was, is en sal wees, wil die Algemene Sinode 'n ernstige beroep op alle lidmate en leraars doen om op 'n Christelike manier met mekaar in gespreke te tree sodat die uitkoms van uitklarende gesprekke tot opbou van die kerk van Christus sal wees.
4. Die Algemene Sinode verklaar daarom aan alle lidmate en leraars dat hulle sal weet dat die NG Kerk in al sy strukture en ampsdraers altyd oop en toeganklik is vir uitklarende gesprekke oor enige aangeleentheid in die gesindheid en styl van ons Here Jesus Christus. (vgl Matt 18). Derhalwe word lidmate genooi om van geleenthede gebruik te maak en deur die beskikbare kanale aan gesprekke twv uitklaring deel te neem.
5. In die lig van reeds afgelope gebeure van misverstand, konflik en ongelukkigheid en ook nog moontlike sodanige insidente in die toekoms, versoek die Algemene Sinode die ASM om 'n ad hoc-taakgroep aan te wys wat herstellende gesprekke in die gees en met die waardes van die luisterseisoen met en tussen betrokkenes kan bemiddel sodat die kerk daadwerklik haar roeping tot en belydenis van die bediening van versoening kan uitleef.

MENSWAARDIGHEID (vgl Agenda A 12.6 bl 196 pt 5; Notule Dag 4 pt 3)

1 Die Algemene Sinode keur die optrede van die ASM ten opsigte van die vestiging van 'n kultuur van menswaardigheid goed.

2 Die Algemene Sinode onderneem, en versoek ook die kerkverband daartoe, om in alle werksaamhede, aksies en strukture te getuig van die Godgegewe waardigheid van alle mense en geregtigheid vir almal na te jaag.

3 Die Algemene Sinode dra dit aan die Moderamen en sinodes op om voortgaande te besin oor menswaardigheid en die werk hieraan verbonde te implementeer.

MENSWAARDIGHEID: SEISOEN VAN MENSWAARDIGHEID (vgl Agenda A.12.6.1 bl 198 pt 4; Notule Dag 4 pt 5)

1 Die Algemene Sinode verbind haarself heelhartig tot deelname aan die Seisoen van Menswaardigheid en versoek die kerkverband ernstig om deel hiervan te wees.

2 Die Algemene Sinode verbind haar om die vier waardes van die Seisoen van Menswaardigheid, nl respek, luister, omarming en selfloosheid te bevorder (die vergadering versoek dat 'n beter woord vir "selfloosheid" gevind word: suggesties wat genoem word, is selfopoffering, onbaatsugtigheid, onselfsugtigheid).

MISSIONALE AARD EN ROEPING VAN DIE NG KERK (vgl Agenda A.12.7 bl 214 pt 21; Dag 2 pt 17)

Die Algemene Sinode ontvang hierdie beleidsdokument as 'n dokument wat uitdrukking gee aan die geloofsonderskeidende prosesse wat die afgelope dekade aandag aan die wese en aard van die kerk en haar getuienis in die wêreld gegee het. Die Algemene Sinode aanvaar dit as deel van 'n gesprek wat ons help om saam nuwe taal te skep, wat ons lei om nuwe gesprekke te voer en so nuwe, verbeeldingryke moontlikhede vir die toekoms van die NG Kerk te ontdek.

MISSIONALE AARD EN ROEPING VAN DIE NG KERK: NUWE NADENKE OOR DIE KERKORDE (vgl Agenda T.14.2 bl 6 pt 5.1.1, A.12.7 bl 214 pt 21; Notule Dag 3 pt 13)

1 Die Algemene Sinode keur Aanbevelings 21.2 tot 21.2.8 (Agenda bl 214-215) met die vereiste twee derdemeerderheidstem goed, met die volgende wysigings:

2 Die Algemene Sinode keur die volgende wysigings aan Die Kerkorde goed:

2.1 Wysig die opskrif van Hoofstuk 1 om te lui: "DIE BELYDENIS, AARD EN ORDE VAN DIE KERK"

2.2 Artikel 2: voeg 'n nuwe Artikel 2 in wat lui: "Die Nederduitse Gereformeerde Kerk is deur God Drie-enig geroep om deel te neem aan die missie van God in die wêreld. Die Kerk word deur die Heilige Gees opgebou om God se eer te dien, en verkondig die bediening van versoening en die heil van Christus."

2.3 Artikel 9: Wysig die huidige Artikel 9.4 om te lees:

In die gemeente aanvaar die bedienaar van die Woord verantwoordelikheid vir onderskeiding, die bestudering en verkondiging van die Woord van God, die bediening van die sakramente, die diens van die gebede en dissipelskap. Die bedienaar van die Woord is ook saam met die ander ampte verantwoordelik vir:

- eredienste,
- die opbou van die gemeente,
- onderrig en toerusting van gelowiges vir hulle dienswerk,
- die gemeente se dienswerk in die wêreld,
- leiding en organisering van die gemeente,
- uitoefening van Christelike liefde en tug,
- pastorale versorging,
- kerkplanting,
- die voortdurende ontwikkeling van bedieningsvaardighede.

Die kerkraad onderskei en bepaal, saam met die bedienaar van die Woord, die wyse waarop dié verantwoordelikhede, in lyn met bepaalde begaafdhede, uitgeleef word en vervat dit in 'n diensooreenkoms.

2.5 Artikel 16:

*1 Wysig die huidige Artikel 16.1 om te lees:

"Die amp of bediening van die ouderling is gerig op geestelike onderskeiding en leiding, versorging, bestuur en toesig, en omvat:..."

*2 Voeg 16.1.9 in:

"dissipelskap" (huidige 16.1.9 word 16.1.10)

2.6 Artikel 53: Wysig die huidige Artikel 53 om te lui:

53.1 *Die missie van die Drie-enige God, Vader, Seun en Heilige Gees is om lewe en volheid aan die wêreld te gee, en die kerk is in diens van God se missie.*

53.2 *Deur die Woord en Gees vergader God vir Hom 'n gemeente. Deur dié gemeente:*

** laat God sy Woord verkondig,*

- * bring Hy die gemeenskap van heiliges uit alle nasies tot stand,
- * laat Hy diens aan die wêreld in nood lewer,
- * laat Hy sy opdrag om die skepping en lewe te bewaar sigbaar tot uitdrukking bring, en
- * word sy geregtigheid en versoening verkondig.

So laat Hy sy koninkryk kom.

53.3 Die gestuurde kerk bedien die evangelie in al sy dimensies aan mense wat die evangelie nie ken nie of daarvan vervreemd is.

53.4 Elke gemeente is 'n gestuurde gemeente en so elke lidmaat van die gemeente.

2.7 Die Algemene Sinode gee opdrag aan die ATR om die Kerkorde in sy geheel aan die hand van hierdie verslag te hersien.

MODERAMEN: SAMESTELLING VAN DIE (vgl Agenda A.12 bl 124 pt 1.1.3; Notule Dag 5 pt 10)

Die Algemene Sinode neem kennis van die bona fide oorsig dat die volledige Moderamen nie tydens die vergadering van 2011 voorgelê is nie. Die Algemene Sinode besluit om die samestelling soos op 14 Oktober 2011 in hierdie notule op te neem:

* Lede van Moderatuur tydens die sitting verkies: prof CJP (Nelus) Niemandt, dr AR (Braam) Hanekom, dr JH (Johann) Ernst, ds CJ (Nelis) van Rensburg

* Verteenwoordigers van sinodes soos aangewys deur sinodes se afgevaardigdes (sekundi in hakies): Wes-en-Suid-Kaap: dr E (Elize) Morkel (ds M Sahd); Oos-Kaap: dr ACV (Chris) van Wyk (ds EGJdeG Schutte); Noord-Kaap: ds GJ (Gert) Duursema (dr JJ Knoetze); KwaZulu-Natal: ds PJ (Pieter) Raath (ds FJ van der Merwe); Vrystaat: dr PJ (Pieter) van Jaarsveld (prof JJ van Rensburg); Wes-Transvaal: ds JNJ (Jacie) van Rensburg (ds NWJ van Rensburg); Noordelike Sinode: dr GF (Gustav) Claassen (dr L Ungerer); Hoëveld Sinode: dr C de K (Neels) du Randt (dr DJ Malan); Oostelike Sinode: dr FJ (Ferdie) Clasen (ds DE van der Spuy); Namibië: ds JJ (Pine) Pienaar (dr JC Woest)

* Addisionele lede: ds N (Norma) Rossouw; me IP (Elna) Schoeman; mnr FW (Frik) Bosman, me EJ (Elize) Bezuidenhout

* Algemene Sekretaris: dr JJ (Kobus) Gerber

NAVORSING (vgl Agenda A.13 bl 253 pt 6; Notule Dag 5 pt 23)

1 Die Algemene Sinode

1.1 bevestig dat navorsing onontbeerlik vir die werksaamhede van die Sinode is;

1.2 versoek die Sinode om 'n Taakspan: Navorsing aan te wys;

1.3 versoek die Moderamen om 'n begroting vir die funksionering van die Taakspan beskikbaar te stel;

1.4 versoek die Moderamen om jaarliks vir navorsingsprojekte wat in lyn is met die gestelde prioriteite te begroot;

1.5 bevestig die belang van die 2014-opname vir die kerk en versoek gemeentes en sinodes om dit te ondersteun.

ONDERSTEUNENDE BETAALSTELSEL (vgl Agenda A.3 bl 52 pt 3.3.4.2; Notule Dag 5 pt 15)

Die Algemene Sinode besluit dat die Algemene Steunspan Fondse en Bates die ondersteunende betaalstelsel in oorleg met die Algemene Steunspan Predikantesake moet ondersoek.

ONDERWYS: ONDERSOEK NA DIE STIG VAN ONDERWYSSENTRUMS (vgl Agenda A.12.11.1 bl 241 pt 6.2; Notule dag 2 pt 36)

Die Algemene Sinode gee opdrag aan 'n taakspan om die wyer betrokkenheid by onderwys en opleiding te ondersoek wat die totstandkoming van skole en opleidingsentrums insluit.

ONDERWYS: ONDERWYS EN OPVOEDING (vgl Agenda A.12.11.1 bl 241 pt 6; Notule Dag 3 pt 16)

Die Algemene Sinode herbevestig die absolute belangrikheid van die opleiding en ontplooiing van Christen onderwysers. Derhalwe versoek die Algemene Sinode sinodes, ringe en kerkrade om jongmense aan te moedig om hulle as onderwysers te bekwaam.

OUERLINGE MET DIE VERGUNNING OM EREDIENSTE TE LEI (vgl Agenda A.15.1 bl 268 pt 10.5.5; T.14.2 bl 7 pt 7.1.3, A.14 (Aanvullend) bl 50 pt 2.3.2; Notule Dag 3 pt 17)

Die Algemene Sinode keur Aanbeveling 2.3.2 op bladsy 50 van die Aanvullende Agenda goed: **PROSEDURE BY DIE IMPLEMENTERING VAN ARTIKEL 48.3.5**

1 Die Algemene Sinode verwys die volgende rakende die prosedure by die hantering van Artikel 48.3.5 na die ATR vir hantering en die voorlegging van riglyne aan die ASM vir goedkeuring:

*Aan watter vereistes moet so persoon voldoen?

*Watter keuringsproses moet gevolg word?

- *Oor watter vermoëns moet so persoon beskik?
 - *Is die vergunning beperk tot 'n bepaalde gemeente asook vaste termyn?
 - *Kan so persoon aansoek doen, of word hy/sy deur die kerkraad genomineer/uitgenooi?
 - *Watter minimum akademiese vereistes/kursusse word gestel voordat iemand die vergunning kan kry?
 - *Watter rol speel die kerkraad/ring in die toesighouding van die suiwer verkondiging van die Woord?
 - *Wat behels "preekvergunning"? Is dit beperk tot leesdienste? Kan so 'n persoon eie preke maak? Is dit beperk tot prediking of mag sakramente bedien word?
- 2 Die Algemene Sinode neem kennis van Aanbeveling 10.5.5 op bladsy 268 van die Agenda en verwys die voorgestelde werkswyse in punte 10.5.1 tot 10.5.4 na die ATR vir oorweging en moontlike opname in die verlangde Riglyne vir die Implementering van Artikel 48.3.5.

OWO'S: REGISTRASIE VAN KERKLIKE REGSPERSONE AS OWO'S (vgl Agenda A.12.11 bl 237 pt 3.5.4; T.14.3 bl 9 pt 8.2.4; Notule Dag 5 pt 6)

Die Algemene Sinode neem kennis van Aanbeveling 3.5.4 op bladsy 237 van die Agenda en keur Aanbeveling 9.2 op bladsy 142 van die Agenda goed (kyk ook T.14.3 bl 7 pt 7.2.1; Notule Dag 5 bl....), naamlik: Die Algemene Sinode versoek die ATF om in oorleg met die ATR die Reglement vir Eiendomme, Goedere en Fondse indringend te hersien en toepaslike besluite van die Algemene Sinode rakende die oprigting, beheer en bestuur van kerklike maatskappye en ander regsenteite, asook die vereistes van tersaaklike wetgewing, daarin op te neem.

PREDIKANTEBEGELEIDING (vgl Agenda A.3 bl 49 pt 3.1.3.3; Notule Dag 2 pt 37)

- 1 Die Algemene Sinode neem met dank kennis van die groot werk wat die onderskeie sinodes en ringe doen om gelegitimeerdes in hul bedienings- en selfontwikkeling te ondersteun.
- 2 Die Algemene Sinode moedig alle gelegitimeerdes aan om ter wille van hul eie bedieningsvreugde by die geleentheid in te skakel.

PREDIKANTEBEGELEIDING (vgl Agenda T.3.2 bl 1 pt 4.1; Notule Dag 5 pt 15)

Die Algemene Sinode bevestig dat Predikantebegeleiding in terme van die Kerkorde Art 31 en 35 die opdrag van ringe en sinodes is en begroot vir 'n netwerk tussen sinodes met die oog op beleid en koördinerings.

PREDIKANTESAKE: STANDPLAASVERWISSELING (vgl Agenda T.3.2 bl 1 pt 2.1; Notule Dag 5 pt 15)

Die Algemene Sinode:

1 Gee opdrag aan die Algemene Steunspan Predikantesake (ASP) om:

- 1.1 studie te doen waar standplaasverwisseling wyer strek as net tussen twee leraars en waar leraars sowel as kerkrade, ringe en sinodes aan die proses van standplaasverwisseling kan deelneem.
- 1.2 beleid op te stel sodat die proses van standplaasverwisseling meer deursigtig is en sonder agterdog deur die hele kerk gebruik kan word.

Versoek die ASP om in hierdie beleid die volgende te verreken:

- 2.1 dat beide kerkraad en leraar aan die proses van standplaasverwisseling kan deelneem.
- 2.2 die moontlikheid ondersoek hoe leraars wat langer as tien jaar in een gemeente is, na gesprek met die kerkraad en ring, oorweeg kan word vir standplaasverwisseling.

3 Versoek leraars, kerkrade, ringe en sinodes wat standplaasverwisseling oorweeg om die voorgestelde riglyne in die konsephandleiding (hoofstuk 6) te gebruik met terugvoer oor die werkbaarheid daarvan aan die ASP.

PREDIKANTESAKE: BEFONDSING VAN DIE ALGEMENE STEUNSPAN PREDIKANTESAKE (ASP) (vgl Agenda T.3.2 bl 1 pt 4.1; Notule Dag pt 15)

Die Algemene Sinode:

1 versoek die ASP om:

- 1.1 alle werksaamhede (huidige en verwagte) van die Kantoor van die ASP duidelik uit te spel;
- 1.2 die verlangde postestruktuur met gepaardgaande posbeskrywings en pos-evaluerings saam te stel;
- 1.3 die omskrywing van die kantooruimtes en -behoefte vir 4.1.1.1 te doen;
- 1.4 die begroting saam te stel wat die totale finansiële behoeftes uitspel;
- 1.5 die finale voorlegging met gemotiveerde aanbevelings tesame met die voorgestelde begroting hiervan aan die Bedryfspan in samewerking met die ASFB aan die Algemene Sinodale Moderamen (ASM) voor te lê vir afhandeling.

2 keur goed dat die ASP in die volgende twee jaar – dit wil sê tot by die volgende Algemene Sinode – die opdragte wat deur die Algemene Sinode aan die ASP opgedra is, af te handel.

3 besluit dat die bestaande pos van die bestuurder afgeskaal word na 'n deelydse pos wat uit die registrasiefooi van bedienaars van die Woord befonds moet word;

4 besluit dat alle moontlike stappe en kontroles in werking gestel moet word om die huidige en agterstallige registrasiefooi in te vorder;

5 versoek die sinodes om behulpsaam te wees met die invordering van die bedienaars van die Woord se huidige en agterstallige registrasiefooi;

6 bevestig sy besluit van 2011 dat alle persone wat oor bedieningsbevoegdheid beskik jaarliks by die ASP moet registreer en die registrasiefooi oorbetaal.

PREDIKANTESAKE: SAMESTELLING VAN DIE ABR (vgl Agenda A.3 bl 53 pt 4.1.3; Notule Dag 5 pt 15)

Die Algemene Sinode besluit om die samestelling van die ABR soos volg te wysig:

1 Verander Regl 8 pt 2.3.3 *“die verteenwoordiger van die Algemene Kuratorium, met sekundus”* om te lees *“twee verteenwoordigers van teologiese opleiding (een uit die Algemene Kuratorium en een van die VBO Forum), met sekundi”*.

2 Verander Regl 8 pt 2.3.4 *“die verteenwoordiger van predikantebegeleiding, met sekundus”* om te lees *“twee verteenwoordigers van predikantebegeleiding, met sekundi”*.

PREDIKANTESAKE: BENAMING VAN DIE ABR (vgl Agenda A.3 bl 53 pt 4.2.2; Notule Dag 5 pt 15)

Die Algemene Sinode besluit om die naam van die Algemene Bevoegdheidsraad te wysig na *Algemene Steunspan vir Predikantesake*.

PREDIKANTESAKE: STATUTÊRE REGISTRASIE (vgl Agenda A.3 bl 49 pt 3.2.1.3; Notule Dag 2 pt 37)

Die Algemene Sinode neem kennis van die onderhandelinge wat plaasvind om bedienaars van die Woord statutêr as pastorale versorgers te laat registreer.

PREDIKANTESAKE: BEDIENINGSBEOORDELINGSISTEEM (vgl Agenda A.3 bl 49 pt 3.2.2.4; Notule Dag 2 pt 37)

1 Die Algemene Sinode neem kennis van die konsepmodel wat ontwikkel is om kerklike vergaderings te help om bedienaars van die Woord se bediening en amptenare se werk te evalueer en te ondersteun.

2 Die Algemene Sinode moedig kerklike vergaderings aan om die konsepmodel te gebruik en kommentaar aan die ABR deur te stuur.

PREDIKANTESAKE: ABR-HANDLEIDING (vgl Agenda A.3 bl 51 pt 3.2.3.3, T.14.1 bl 1 pt 2.1.2; Notule Dag 2 pt 37) (soos gewysig in pt 3.2.3.3.1):

1 Die Algemene Sinode neem die ABR Handleiding as werksdokument in ontvangs.

2 Die Algemene Sinode moedig kerklike vergaderinge aan om van die Handleiding gebruik te maak.

3 Die Algemene Sinode versoek kerklike vergaderinge om kommentaar aan die ABR deur te stuur teen 31 Maart 2014 met die oog op die finalisering van die Handleiding.

PREDIKANTESAKE: VBO-KREDIETSTELSEL (vgl Agenda A.3 bl 51 pt 3.3.1.1; Notule Dag 2 pt 37)

Die Algemene Sinode bevestig dat die VBO-kredietstelsel, soos voorheen goedgekeur, onveranderd hanteer sal word.

PREDIKANTESAKE: SELFSORGKREDIETSISTEEM (vgl Agenda A.3 bl 52 pt 3.3.2.4; Notule Dag 2 pt 37)

1 Die Algemene Sinode keur die selfsorgkredietsistees as aanvulling tot die VBO-kredietstelsel goed.

2 Die Algemene Sinode versoek die ABR om advies aan ringe en kerkrade te voorsien met die oog op die hantering van die selfsorg-krediete in aanvulling tot die VBO-krediete.

PREDIKANTESAKE: STANDPLAASVERWISSELING(vgl Agenda B.1 bl 281 pt 3.2, T.14.2 bl 3 pt 3.1.2; Notule Dag 5 pt 19)

Die Algemene Sinode onderskryf nie pt 3.2 van Beskrywingspunt B.1 nie.

PREDIKANTESAKE: VERLENING EN ONTNEMING VAN BEVOEGDHEID (vgl Agenda B.1 bl 281, T.14.4 bl 1 pt 1.1.3; Notule Dag 5 pt 19)

Die Algemene Sinode onderskryf punt 2 van Beskrywingspunt B.1.

PREDIKANTESAKE: TUG- EN/OF DISSIPLINÊRE AANGELEENTHEDE (vgl Agenda B.1 bl 281 pt 3.1, T.14.4 bl 2 pt 2.1.6; Notule Dag 5 pt 19)

Die Algemene Sinode onderskryf nie pt 3.1 van Beskrywingspunt B.1 nie.

PREDIKANTESAKE: VERGOEDINGSPAKKETTE VAN BEDIENAARS VAN DIE WOORD (vgl Agenda B.1 bl 281 pt 3.3, T.14.2 bl 3 pt 4.1.2; Notule Dag 5 pt 19)

Die Algemene Sinode onderskryf nie pt 3.3 van Beskrywingspunt B.1 nie.

PREDIKANTESAKE: ALGEMENE BEVOEGDHEIDSRAAD: VERSOEK VAN SINODE OOS-KAAPLAND AAN DIE ASM (vgl Agenda B.2 bl 282, T.14.4 bl 4 pt 6.2; Notule Dag 5 pt 19)

Die Algemene Sinode neem kennis dat die versoek van die Sinode van Oos-Kaapland (Beswaarskrif B.2) deur die ASM hanteer en afgehandel is.

PRIORITEITE VIR DIE TERMYN TOT BY DIE VOLGENDE ALGEMENE SINODE (vgl Notule Dag 5 pt 22)

1. Die Algemene Sinode ontvang die verslag van die Luisterspan en die Fasiliteerders met dank.
2. Die Algemene Sinode neem kennis die inhoud van die prioriteite van die sinodegesprekke en die tafelgesprekke kom op merkwaardige wyse ooreen. Die orde van die prioriteite verskil wel onderling – met die tafelgesprekke wat moontlik ’n meer getroue weergawe van die rangorde is – maar dit bevestig in elk geval dat ons met ’n redelike mate van sekerheid kan aanneem dat dié 5 prioriteite ook dié van die vergadering is. ’n Individuele stemming sou waarskynlik nie veel hieraan verander nie.
3. Die Algemene Sinode besluit om hierdie prioriteite te ontvang as riglyn vir die werk van die verband tot by die volgende Algemene Sinode.

Prioriteite uit sinodegesprekke (10 sinodes)

Missionale Kerkwees (veral klein gemeentes)	11
Armoede (Gemeenskapsontwikkeling / Werkloosheid / Maatskaplike uitdagings / Sosiale ongeregtigheid)	10
Jeug (Huisgeloof, gesinsontwikkeling en ouerbegeleiding, jeugontwikkeling, opvoeding en onderwys, Jeug tot jeug, #Imagine en Ritmejaar, spesifieke lens op die generasie van 20- en 30-jariges)	10
Belhar en kerkhereniging (Belydenisgrondslag / roetekaart)	6
Menswaardigheid	5
Moraliteit	3
Apostolicum – gesprek	1
Ekumene	1
Getuienis / evangelisasie sekulêre wêreld	1
Homoseksualiteit	1
Predikantesake	1
Publieke getuienis	1
Skrifhantering	1
Teologiese opleiding / amp van predikant	1

Prioriteite uit Tafelgesprekke (33 tafels)

Jeug (Familie- en Gesinsbediening / Kategese / Geloofsvorming / Ouerbegeleiding / #Imagine / Ritmejaar / onderwys / morele vorming)	45
Armoede (oa sosiale ongeregtigheid)	30
Belhar / Kerkhereniging (roetekaart)	25
Menswaardigheid (Seisoen – ook armoede)	25
Missionale kerkwees (diens en getuienis)	23
Moraliteit	9
Publieke Getuienis (veral grondsake)	8
Klein Gemeentes	5
Ekumene	4
Goeie effektiewe kommunikasie van “bo” af (besluite en beleid na grondvlak)	3
Predikantesake (versorging ook van gesinne)	3
Apostolicum	2
Predikante en gemeentebediening	2
Ekonomie	1
Hermeneutiek	1
Dissipelskap	1

PUBLIEKE GETUIENIS (vgl Notule Dag 5 pt 9)

Die Algemene Sinode besluit dat die NG Kerk sy profetiese roeping en opdrag vanuit die Woord duidelik sal laat hoor, sonder aansien van persoon, tov ons samelewing en regering.

REFORMASIE: 500 JAAR-VIERINGE (vgl Agenda A.12.10 bl 231 pt 10.5; Notule Dag 3 pt 10)

1 Die Algemene Sinode besluit om die viering van die Reformasie in 2017 'n besondere plek op die NG Kerk se agenda te maak en versoek sinodes om elk 'n verteenwoordiger op 'n projekspan aan te wys om hieraan aandag te gee.

2 Die Algemene Sinode versoek die kerkverband om die 500 jaar-viering van die Reformasie 'n besondere plek in hulle beplanning te gee.

REGLEMENT VIR APPÈL OF BESWAAR: HERSIENING VAN DIE (vgl Agenda A.14 (Aanvullend) bl 50 pt 2.4.5; Notule Dag 4 pt 27)

Die Algemene Sinode verwys die hersiening na die ATR vir hantering en tussentydse voorlegging aan die ASM vir goedkeuring.

REGLEMENT VIR DIE ALGEMENE STEUNSPAN FONDSE EN BATES (vgl Agenda T.14.2 bl 8 pt 8.1.2, A.6 (Aanvullend) bl 5 pt 4.2; Notule Dag 3 pt 14)

1 Die Algemene Sinode keur die gewysigde Reglement vir die Algemene Steunspan Fondse en Bates (voorheen Algemene Taakspan Fondse) goed:

REGLEMENT VIR DIE ALGEMENE STEUNSPAN FONDSE EN BATES

1. NAAM

Algemene Steunspan Fondse en Bates (ASFB).

2. SAMESTELLING

- 2.1 Die Algemene Sinode/Bedryfspan wys vir elke termyn tussen sinodesittings 'n Algemene Steunspan Fondse en Bates aan.
- 2.2 Die Steunspan word saamgestel uit een lid per sinode met sekondus deur die sinode of sy gevolmagtigde genomineer.
- 2.3 Sinodes kan op eie koste 'n bykomende lid met adviserende stem aanwys.
- 2.4 Die algemene sekretaris en die rekenmeester in die kantoor van die Algemene Sinode is *ex officio* lede van die Steunspan.
- 2.5 Die voorsitters van die komitees wat die Steunspan aanwys, woon die vergadering adviserend by.
- 2.6 Die Steunspan kies 'n voorsitter, ondervoorsitter en skriba uit eie geledere.

3. OPDRAG

Die Steunspan

- 3.1 adviseer die Algemene Sinode in verband met die beleid wat gevolg moet word ten opsigte van finansiële bestuur, bates, beleggings, eiendomme en oudit;
- 3.2 stel jaarliks in oorleg met die Bedryfspan die begroting vir onderskeidelik die strategiese en operasionele werksaamhede van die Algemene Sinode op aan die hand van
 - 3.2.1 Artikel 43 van die Kerkorde;
 - 3.2.2 die Roepingsverklaring van die Algemene Sinode;
 - 3.2.3 die prioriteite deur die Algemene Sinode gestel;
 - 3.2.4 die begrotings- en beleggingsbeleid van die Algemene Sinode; en
 - 3.2.5 die beskikbaarheid van fondse daarvoor.
- 3.3 hou toesig oor die besteding van fondse ten opsigte van al die werksaamhede van die Algemene Sinode, waaronder die administratiewe, personeel- en kapitale uitgawes;
- 3.4 tree in gesprek met die Ouditkomitee soos nodig;
- 3.5 kontroleer en bespreek die jaarlikse geauditeerde finansiële state en bestuursbrief van die Algemene Sinode en lê dit aan die Algemene Sinode/Moderamen vir goedkeuring voor;
- 3.6 lewer jaarliks insette aan die Steundiens Menslike Hulpbronne in verband met die riglyne vir die vergoedingspakket van bedienaars van die Woord;
- 3.7 beoordeel die finansiële implikasies by die vulling van vakatures in poste vir werknemers in algemene sinodale diens;
- 3.8 sien toe dat die *Reglement vir Eiendomme, Goedere en Fondse* uitgevoer word ten opsigte van die Algemene Sinode, die afsonderlike regsenteiteite én trusts se fondse en bates;
- 3.9 tree op in alle regsdinge of dispute oor eiendom, goedere en fondse sonder meer bepaalde lasgewing sowel eisend as verwerend ten behoeve van die Algemene Sinode na raadpleging van die Algemene Steunspan Regte;

- 3.10 stel in oorleg met die Algemene Steunspan Regte reglemente op vir ge-administreerde fondse en lê dit vir goedkeuring voor aan die Algemene Sinode of die Moderamen wanneer die Algemene Sinode nie in sitting is nie;
 - 3.11 wys sonder afstanddoening van aanspreeklikheid die nodige komitees aan om gedelegerde werksaamhede te onderneem, waaronder 'n substeunspan vir beleggings en 'n substeunspan vir eiendom;
 - 3.12 wys elke twee jaar drie fidusiêre verantwoordelike persone aan soos vereis vir die Algemene Sinode as Openbare Weldaadorganisasie; en
 - 3.13 sien toe dat die jaarlikse opgawe van inkomste aan die Suid-Afrikaanse Inkomstediens (SAID) voorsien word soos deur die Belastingvrystellingseenheid van die SAID vereis.
- 4. KONSTITUERING EN VERGADERINGS**
- 4.1 Die Steunspan konstitueer so spoedig moontlik na aanwysing en vergader ten minste twee keer per jaar op nie-elektroniese wyse.
 - 4.2 Indien nodig, kan bykomend van die elektroniese vergaderingswyse gebruik gemaak word.

REGLEMENT VIR DIE ALGEMENE STEUNSPAN PREDIKANTESAKE (vgl Agenda T.14.4 bl 9 pt 14.1 asook T.3.2 bl 4 pt 3.1 en A.3 bl 55 pt 4.4.2; Notule Dag 5 pt 15)

Die Algemene Sinode keur die gewysigde *Reglement vir die Algemene Steunspan vir Predikantesake* met die uitsondering van punt 5 goed. Die punt word na die ASM verwys vir goedkeuring onderhewig aan die uitkoms van die ondersoek waarna paragraaf 4 in die verslag verwys.

REGLEMENT VIR DIE ALGEMENE STEUNSPAN PREDIKANTESAKE

- 1. **NAAM**
Die Algemene Steunspan Predikantesake (ASP)
 - 2. **SAMESTELLING**
 - 2.1 Die Steunspan word deur die Algemene Sinode of die Moderamen aangewys en bestaan uit tien permanente lede (vergelyk 2.3.1 tot 2.3.5 hieronder) wat gesamentlik oor kundigheid en ervaring beskik op die terreine van begeleiding en versorging van bedienaars van die Woord, voortgesette bedieningsontwikkeling van bedienaars van die Woord, bestuur van diensverhoudinge, kerkreg en statutêre reg.
 - 2.2 Minstens twee lede van die Steunspan moet afgevaardigdes na die Algemene Sinode wees.
 - 2.3 Die Steunspan word saamgestel uit:
 - 2.3.1 die verteenwoordiger van die Algemene Steunspan Regte, met sekundus;
 - 2.3.2 die bestuurder van die Kantoor vir Predikantesake;
 - 2.3.3 twee verteenwoordigers van teologiese opleiding (een uit die Algemene Kuratorium en een van die VBO Forum), met sekundi;
 - 2.3.4 twee verteenwoordigers van predikantebegeleiding, met sekundi; en
 - 2.3.5 vier kundiges, waarvan minstens twee nie-gelegitimeerdes moet wees, met sekundi.
 - 2.3.6 Die Steunspan word, wanneer nodig, bygestaan deur een lid uit elke sinode, deur die betrokke sinode of sy gevolmagtigde aangewys, met sekundus. Wanneer die Steunspan 'n bevoegdheidsaangeleentheid hanteer, geskied dit waar moontlik in oorleg met die lid deur die betrokke sinode aangewys.
 - 2.3.7 Die Steunspan kan twee addisionele lede koöpteer.
 - 2.4 Die Kantoor vir Predikantesake hanteer die skribaats van die Steunspan.
 - 2.5 Die voorsitter en ondervoorsitter word deur die Steunspan uit eie geledere aangewys.
 - 2.6 Vakatures in die Steunspan word op aanbeveling van die Steunspan deur die Moderamen aangevul.
 - 2.7 Die voorsitter, bestuurder en nog 'n lid deur die Steunspan aangewys, tree as dagbestuur op.
 - 2.8 Die dagbestuur hanteer, in terme van die Steunspan se opdrag, alle administratiewe en spoedeisende sake met verslag aan die Steunspan.
 - 2.9 Die Steunspan lewer verslag aan die Bedryfspan, Moderamen en die Algemene Sinode.
- 3. WERKSTERREINE EN OPDRAG**
- 3.1 **Beleid**
 - 3.1.1 Adviseer die kerkverband met die beleid wat verband hou met predikantesake
 - 3.2 **Steunspanne**
Die Steunspan verrig sy funksies deur middel van die volgende sub-Steunspanne:
 - 3.2.1 **Bevoegdheidsaangeleenthede**
 - 3.2.1.1 Die verlening van bedieningsbevoegdheid (legitimasië) op aanbeveling van die kuratoria;
 - 3.2.1.2 die opskorting of ontneming van bedieningsbevoegdheid op aanbeveling van 'n ring of sy gevolmagtigde ondersoekliggaam;

- 3.2.1.3 die instandhouding van die bevoegdheidsregister;
- 3.2.1.4 advies aan aansoekers en kerkvergaderinge oor die hantering van aansoeke om herstel van bevoegdheid en die vereistes wat daarvoor nagekom moet word;
- 3.2.1.5 verskaffing van tersaaklike inligting aan kerklike vergaderings en die Jaarboek oor bedieningsbevoegdheid van proponente, bedienaars van die Woord en emeriti;
- 3.2.2 Diensverhoudinge
- 3.2.2.1 Die gee van advies en leiding aan sinodes, ringe en kerkrade, in oorleg met die Algemene Sinode se Aktuaris en die betrokke sinode se aktuaris, met die oog op eenvormige en gekoördineerde optrede ten opsigte van hantering van diensverhoudinge;
- 3.2.2.2 die samestelling en bywerk van die Bestuurshandleiding vir Diensverhoudinge; en
- 3.2.2.3 die jaarlikse aanbeveling van die riglyne vir vergoedingspakkette van bedienaars van die Woord aan in oorleg met die Algemene Steunspan Fondse en Bates.
- 3.2.3 Arbeidsregtelike Dienste
- 3.2.3.1 Die instandhouding van 'n persoonlike lêer waarin die bevindinge van alle tug-, dissiplinêre en appêlsake waarby studente en geleitmeesters betrokke is, aangeteken word;
- 3.2.3.2 die gee van advies en leiding aan ondersoekliggame in oorleg met die Algemene Sinode se Aktuaris en die betrokke sinode se aktuaris met die oog op eenvormige en gekoördineerde optrede ten opsigte van hantering van tug- en dissiplinêre ondersoeke, appêlsake en beslissings oor bedieningsbevoegdheid;
- 3.2.3.3 opleiding en toerusting ten opsigte van arbeidsregtelike en gemeenregtelike aangeleenthede in tug- en/of dissiplinêre optrede en bevoegdheidsaansoeke;
- 3.2.3.4 die gee van advies aan ondersoekliggame in oorleg met die aktuaris van die Algemene Sinode en die sinodes.
- 3.2.4 Standplaasverwisseling
- 3.2.4.1 Die gee van advies en gee leiding oor beleid aan die sinodale predikantebegeleiers, aan sinodes, ringe, kerkrade en bedienaars van die Woord oor beleid tov standplaasverwisseling; en
- 3.2.4.2 die verlening van hulp met passingsprosesse.
- 3.2.5 Predikantebegeleiding
- 3.2.5.1 Die gee van advies en gee leiding in oorleg met die sinodale predikantebegeleiers oor beleid ten opsigte van die A-Z Beleid, predikanteversorging en die mentorprogram.
- 3.2.6 Opleiding en VBO
- 3.2.6.1 Die lewering van jaarliks insette by die Algemene Steunspan Teologiese Opleiding rakende behoeftes van opleiding aan studente;
- 3.2.6.2 die lewering van jaarliks insette by die VBO-Forum en diensverskaffers rakende voortgesette bedieningsontwikkeling; en
- 3.2.6.3 die administrasie van krediete vir voortgesette bedieningsontwikkeling.
- 3.3 Sekretariaat
- 3.3.1 Die gereelde instandhouding van die bevoegdheidsregister;
- 3.3.2 die hantering van alle korrespondensie rakende die bevoegdheidsregister;
- 3.3.3 die hantering van die skriba van die Steunspan.
- 3.4 Begroting en befondsing
- 3.4.1 Die begroting vir die kantoor en werksaamhede van die Steunspan word deur die Algemene Steunspan Fondse en Bates en die Bedryfspan in samewerking met die Steunspan hanteer.
- 3.4.2 Die werksaamhede van die Kantoor, Steunspan en sub-Steunspanne wat betrekking het op alle bevoegdheidsaangeleenthede, word befonds uit die registrasiefooi wat slegs hiervoor aangewend mag word. Die jaarlikse registrasiefooi word deur die Bedryfspan op aanbeveling van die Steunspan en die Algemene Steunspan Fondse en Bates vasgestel.
- 3.4.3 Die Algemene Sinode begroot vir werksaamhede van die Steunspan wat op die terrein van die Algemene Sinode tuishoort.
- 4. **VERGADERINGS**
- 4.1 Die Steunspan vergader minstens kwartaalliks waarvan een vergadering per jaar uitgebrei word met een verteenwoordiger uit elke sinode op koste van die sinode.
- 4.2 Die substeunspanne vergader soos nodig.
- 5. **KANTOOR VIR DIE STEUNSPAN**
- 5.1 Die Steunspan:
- 5.1.1 neem 'n bestuurder in diens wat die Kantoor bestuur en die werksaamhede koördineer; en
- 5.1.2 skep 'n ondersteunde infrastruktuur vir die werksaamhede.

REGLEMENT VIR DIE BEROEP, BEVESTIGING, DEMISSIE EN EMERITAAT VAN 'N BEDIENAAR VAN DIE WOORD (NUWE REGLEMENT) (vgl Agenda A.14 (Aanvullend) bl 41 pt 1.2.1; Notule Dag 4 pt 22)

REGLEMENT VIR DIE BEROEP, BEVESTIGING, DEMISSIE EN EMERITAAT VAN 'N BEDIENAAR VAN DIE WOORD

1. ALGEMEEN

1.1 'n Bedienaar van die Woord word beroep vir diens aan die gemeente of benoem vir diens aan die kerkverband (vergelyk Artikel 8.1 en 8.2 van die Kerkorde).

1.2 'n Bedienaar van die Woord kan beroep, bevestig en uitgestuur word vir die gemeente se sending- /getuienisaksie of vir sending-/getuienisdienste saam met ander kerke of sendingorganisasies (vergelyk 2.5.1.2 en 2.8 van die Reglement vir die Sending/Getuienis van die NG Kerk).

1.3 Gelegitimeerdes van die ander lidkerke van die NG Kerkfamilie kan in die NG Kerk beroep en bevestig word, op voorwaarde dat

1.3.1 die beroepene aan die vereistes van die NG Kerk vir opleiding en legitimasie voldoen (vergelyk Funktionele Besluit 5), of

1.3.2 die Algemene Taakspan op aanbeveling van die ring goedgekeur het dat die beroepene met beperkte opdrag bevestig kan word (vergelyk *Funktionele Besluit : Beroeping met beperkte opdrag*).

1.4 Gelegitimeerdes van ander gereformeerde kerke met wie die NG Kerk in terme van 'n bilaterale ooreenkoms in volle verhouding staan, kan met inagneming van spesifieke vereistes wat die NG Kerk stel, in die NG Kerk beroep en bevestig word (vergelyk 4.3.1 en 4.7.1 van die Reglement vir die Verhouding tot Ander Kerke en Groepe).

1.5 Die bepalinge van hierdie reglement is van toepassing by die beroeping, bevestiging, demissie en emeritaat van bedienaars van die Woord in voltyds-onbepaalde, tentmaker- en vaste termynposte.

2. BEROEPING VIR DIENS AAN GEMEENTE

2.1 Die kerkraad van die gemeente beroep 'n bedienaar van die Woord vir diens aan die gemeente en kry daarvoor die goedkeuring (approbasie) van die lidmate van die gemeente en die ring.

2.2 Voordat die beroepsbrief afgestuur word, moet

2.2.1 die goedkeuring (approbasie) van die gemeente deur afkondiging verkry word; en

2.2.2 die ring of sy gevolmagtigde kommissie skriftelik bevestig dat daar aan al die kerklike vereistes vir die uitbring van die beroep voldoen is.

2.2.3 Besware teen 'n beroep of beroepene word by die betrokke ring of ringskommissie ingedien, wat dit volgens die bepalinge van die betrokke sinodale gebied hanteer (sien ook 8. hieronder).

2.2.4 Indien nie aan die vereistes voldoen is nie, word die beroep deur die ring of sy gevolmagtigde kommissie ongeldig verklaar.

3. BENOEMING VIR DIENS AAN KERKVERBAND

3.1 Die ring, sinode of Algemene Sinode se gevolmagtigde benoem 'n bedienaar van die Woord vir diens aan die kerkverband en kry daarvoor die goedkeuring (approbasie) van die kerkverband.

3.2 Voordat die benoemingsbrief afgestuur word, moet

3.2.1 die goedkeuring van die kerkverband deur bekendmaking van die benoeming in die Kerkbode verkry word; en

3.2.2 die betrokke sinodale regs-/kerkordekommissie of sy gevolmagtigde skriftelik bevestig dat daar aan al die kerklike vereistes vir die benoeming voldoen is.

3.2.3 Besware teen 'n benoeming of benoemde word by die betrokke sinode of sinodale kommissie ingedien, wat dit volgens die bepalinge van die betrokke sinodale gebied hanteer.

4. PROSEDURE BY BEROEPING

4.1 Die kerkraad bepaal die posvereistes en kan die pos in die Kerkbode bekend stel.

4.2 Die kerkraad stel 'n groslys op een of meer van die volgende wyses saam:

4.2.1 lede van die kerkraad kan tydens die beroepsvergadering name op die groslys plaas; en/of

4.2.2 die ringskommissie en/of die Algemene Bevoegdheidsraad kan deur die kerkraad versoek word om vooraf name op die groslys te plaas; en/of

4.2.3 die lidmate van die gemeente kan versoek om by die skriba van die kerkraad name in te gee vir vooraf plasing op die groslys; en/of

4.2.4 die naam van die beroepende gemeente en die datum van die beroepsvergadering kan onder amptelike berigte in die Kerkbode geplaas word en gelegitimeerdes kan sodoende versoek word om hulle name tesame met 'n curriculum vitae aan die skriba van die kerkraad te stuur vir vooraf plasing op die groslys.

4.3 Die kerkraad van die beroepende gemeente kan aan gelegitimeerdes wie se name vooraf op die groslys geplaas is, 'n vraelys stuur waarin bedieningsgerigte vrae gestel word.

4.4 Die kerkraad kan 'n curriculum vitae aanvra van enige persoon wie se naam vooraf op die groslys geplaas is.

4.5 Vertroulikheid word gehandhaaf ten opsigte van die persoonlike inligting van diegene wie se name op die groslys geplaas is.

4.6 Indien die kerkraad van 'n pre-advieskommissie gebruik maak, word die name met die beskikbare inligting aan die kommissie voorgelê.

- 4.6.1 Die pre-advieskommissie bepaal aan die hand van die posvereistes wie die geskikte persone vir die pos is.
- 4.6.2 Die pre-advieskommissie lê die name van minstens drie geskikte persone in alfabetiese volgorde aan die kerkraad voor, tesame met al die ander name op die groslys.
- 4.6.3 Die pre-advieskommissie kan inligting oor persone wie se name op die groslys is, sonder beïnvloeding aan die kerkraad voorsien.
- 4.7 Op versoek van die kerkraad en met opgaaf van rede(s), kan die ring of sy gevolmagtigde kommissie goedkeuring verleen dat minder as drie (3) name op die groslys geplaas word.
- 4.8 Die beroeping vind op geslote stemwyse plaas en wel soos volg:
- 4.8.1 Die aanwesige kerkraadslede moet 'n kworum wees.
- 4.8.2 Elke lid van die vergadering moet stem.
- 4.8.3 Persone wat die vergadering in adviserende hoedanigheid bywoon (waaronder die verteenwoordiger van die ring en die lede van die pre-advieskommissie wat nie kerkraadslede is), kan aan die bespreking deelneem, maar mag nie stem nie.
- 4.8.4 Die persoon op wie die meeste stemme verenig word, is verkies indien die getal stemme op die persoon uitgebring die volstreekte meerderheid van die aanwesige stemgeregtigdes uitmaak.
- 4.8.5 Indien 'n persoon nie 'n volstreekte meerderheid van stemme kry nie, vind daar 'n verdere stemming plaas uit die name wat die hoogste getal stemme gekry het en saam 'n volstreekte meerderheid vorm.
- 4.8.6 Indien daar 'n staking van stemme is wat nie deur verdere stemming opgelos kan word nie, geskied die beslissing deur die lot.
- 4.9 In gevalle waar die benoeming deur die kerkverband geskied, sien die kerkvergadering toe dat aan die toepaslike vereistes van hierdie gedeelte van die reglement voldoen word.
- 5. BEROEPSBRIEF**
- 5.1 Die kerkraad stel die beroepsbrief op.
- 5.2 'n Verteenwoordiger van die ring, wat nie lidmaat van die betrokke gemeente is nie, adviseer die kerkraad in die opstel van die beroepsbrief.
- 5.3 In die geval van benoeming deur die kerkverband, word die advies deur die betrokke sinodale regs- /kerkordekommissie gegee.
- 5.4 Die beroepsbrief is die diensaanbod wat aan die hand van Artikel 9 van die Kerkorde die diensopdrag en in terme van Artikel 13 van die Kerkorde die diensvoordele van die beroepene omskryf.
- 5.5 In gevalle van benoeming deur die kerkverband, word die nodige aanpassings gemaak ten opsigte van die diensopdrag en diensvoordele.
- 5.6 Onderhandeling rakende beskikbaarheid vir die pos en enige diensvoorwaardes, kan slegs plaasvind nadat die beroep uitgebring is.
- 6. KENNISGEWING VAN BEROEP**
- 6.1 Die voorsitter van die kerkraadsvergadering gee dadelik aan die gelegitimeerde wat beroep is, kennis van die beroep wat uitgebring is.
- 6.2 Die Kerkbode word onverwyld deur die skriba in kennis gestel van die uitbring van die beroep (later ook van die aanneming of bedanking daarvan).
- 7. GOEDKEURING VAN BEROEP**
- 7.1 Waar 'n bedienaar van die Woord beroep word, word die naam van die beroepene op twee agtereenvolgende Sondae tydens die erediens aan die gemeente vir goedkeuring (approbasie) deur die gemeente bekendgemaak.
- 7.2 So gou doenlik na die laaste bekendmaking van die beroep en nadat die tyd vir besware verby is, lê die voorsitter van die kerkraad die betrokke stukke aan die skriba van die ring of sy gevolmagtigde kommissie voor.
- 7.3 Die ring of sy gevolmagtigde kommissie kontroleer of daar aan die volgende kerkordelike vereistes vir die uitbring van die beroep voldoen is:
- 7.3.1 skriftelike bevestiging van die Algemene Bevoegdheidsraad dat die beroepene na 'n gemeente van die Kerk beroepbaar is;
- 7.3.2 skriftelike bevestiging van die gemeente waarin die beroepene is, dat hy/sy lidmaat is;
- 7.3.3 skriftelike bevestiging van die verteenwoordiger van die ring tydens die beroepsvergadering dat die korrekte kerkordelike prosedures gevolg is met die uitbring van die beroep;
- 7.3.4 die voltooide beroepsbrief behoorlik onderteken is deur die gevolmagtigdes van die kerkraad;
- 7.3.5 skriftelike bevestiging van die ring onder wie se opsig die beroepene staan, dat daar geen tug en/of dissiplinêre ondersoek teen die beroepene hangende is nie en/of dat die persoon beroepbaar is; en
- 7.3.6 bevestiging deur die beroepende vergadering dat geen wettige beswaar teen die beroep uitgebring is nie.
- 7.4 Waar 'n benoeming deur die kerkverband gemaak word (vergelyk Artikel 8.2 van die Kerkorde),

verkry die vergadering wat die benoeming maak die goedkeuring van die kerkverband deur bekendmaking van die benoeming in die Kerkbode en word die stukke genoem in 7.3.1 tot 7.3.6 aan die sinodale regs- /kerkordekommissie voorgelê vir goedkeuring.

7.5 Indien nie aan die vereistes voldoen is nie, word die beroep deur die ring of sy gevolmagtigde kommissie, of die benoeming deur die sinodale regs-/kerkordekommissie, ongeldig verklaar.

7.6 Sodra die beroep deur die ring of sy gevolmagtigde kommissie of die benoeming deur die sinodale regs- /kerkordekommissie goedgekeur is, word die beroepsbrief of benoemingsbrief aan die beroepene of benoemde gestuur vir oorweging van die beroep of benoeming.

7.7 Die beroepene het na ontvangs van die beroepsbrief 'n maksimum van veertien (14) dae om die beroep te aanvaar of te bedank, tensy uitstel daartoe deur die kerkraad verleen word.

8. BESWARE TEEN BEROEP

8.1 Enige ongesensureerde belydende lidmaat van die beroepende gemeente, het die reg om tot 24 uur na die tweede afkondiging van die beroep, skriftelike beswaar met opgawe van rede(s) by die kerkraad in te dien.

8.2 Besware mag slegs gegrond wees op bepaalde klagtes teen die leer of lewe van die beroepene, of op grond van klagtes insake onreëlmatigheid in verband met die uitbring van die beroep.

8.3 Besware teen die beroep ingebring, word soos volg hanteer:

8.3.1 Die besware word by die skriba van die kerkraad ingedien, wat die voorsitter versoek om spoedeisend die kerkraad byeen te roep om die besware in behandeling te neem.

8.3.2 Indien die besware handel oor onreëlmatighede gedurende die beroepingsproses, verwys die kerkraad dit na die ringskommissie vir beslissing.

8.3.3 Indien die besware handel oor die leer of lewe van die beroepene, doen die kerkraad navraag daaroor by die ring onder wie se opsig die beroepene staan.

8.3.4 Indien die besware ongegrond is, word voortgegaan met die beroep.

8.3.5 Indien dit blyk dat die besware gegrond is, word die beroep deur die ring of sy gevolmagtigde kommissie ongeldig verklaar.

8.3.6 Indien die ring die beroep ongeldig verklaar, gee die kerkraad aan die beroepene daarvan kennis met opgaaf van rede(s) en kan 'n ander beroep uitgebring word.

9. DIENSOORENKOMS

9.1 Na oorweging van die bepalinge van die beroepsbrief en enige onderhandelinge daaromtrent, word die diensoorenkoms waarvolgens die bedienaar van die Woord in diens van die gemeente of die kerkverband gaan tree, finaal opgestel.

9.2 Die diensoorenkoms bevat inhoudelik die volgende:

9.2.1 Identifikasie van die partye.

9.2.2 Aanhef.

9.2.3 Diensoms krywing: Algemene diensverpligtinge (sien Artikel 9 van die Kerkorde) met gepaardgaande spesifieke verwagtinge.

9.2.4 Vergoeding en byvoordele (sien Artikel 13 van die Kerkorde).

9.2.5 Die wedersydse erkenning deur die partye dat hulle geskrewe ooreenkoms onderhewig is aan die bepalinge van die Kerkorde en die besluite van die Algemene Sinode en die betrokke sinode soos van tyd tot tyd gewysig.

9.2.6 Aanvangsdatum:

9.2.6.1 In die geval van bedienaars van die Woord in diens van gemeentes of in diens van die kerkverband, die datum van demissie uit die vorige gemeente of werkkring.

9.2.6.2 In ander gevalle waar 'n beroep aanvaar is, is die aanvangsdatum die datum van bevestiging of 'n datum van indienstreding soos ooreengekom.

9.2.7 'n Verklaring deur die beroepene dat daar geen hangende of dreigende tughandeling teen hom/haar is nie en dat hy/sy aan die plegtige legitimasië-verklaring getrou sal bly.

9.2.8 Die partye se handtekeninge met getuies en datum van ondertekening as aanvaarding dat 'n diensoorenkoms tussen die partye tot stand kom.

9.3 Die finale diensoorenkoms van 'n bedienaar van die Woord in diens van 'n gemeente word deur die ring of sy gevolmagtigde kommissie en in geval van 'n bedienaar van die Woord in diens van die kerkverband deur die betrokke sinodale regs-/kerkordekommissie goedgekeur. Hierna word die finale ooreenkoms deur beide partye onderteken en kan die bevestiging plaasvind met inagneming van die ander vereistes vir bevestiging.

9.4 Hierdie diensoorenkoms kan van tyd tot tyd gewysig word met instemming van beide partye en skriftelike goedkeuring van die ring of sy gevolmagtigde kommissie in die geval van 'n bedienaar van die Woord in diens van 'n gemeente, of die betrokke sinodale regs-/kerkordekommissie in die geval van 'n bedienaar van die Woord in diens van die kerkverband.

10. BEVESTIGING

10.1 Die bevestiging van 'n bedienaar van die Woord vir diens aan 'n gemeente geskied nadat:

10.1.1 die beroepende kerkraad die volgende stukke by die ring of sy gevolmagtigde kommissie

ingedien het:

10.1.1.1 'n afskrif van die getekende dienskontrak;

10.1.1.2 'n afskrif van die beroepene se akte van demissie uit die vorige werkring óf 'n getuigskrif van eervolle ontslag in die geval van diens aan 'n instansie buite die kerkverband óf die akte van legitimasie in die geval van 'n proponent wat beroep is;

10.1.1.3 'n afskrif van die beroepene se attestaat van die vorige gemeente wat by die beroepende gemeente ingedien is; en

10.1.1.4 'n skriftelike bevestiging van die pensioenkantoor dat die beroepene se pensioen in orde is.

10.1.2 die ring of sy gevolmagtigde kommissie skriftelik bevestig het dat aan die kerkordelike vereistes (sien 10.1.1) voldoen is.

10.2 Die bevestiging van 'n bedienaar van die Woord in diens aan die kerkverband geskied nadat:

10.2.1 die kerkvergadering wat die benoeming gemaak het of sy gevolmagtigde kommissie die volgende stukke by die betrokke sinodale regs-/kerkordekommissie ingedien het:

10.2.1.1 'n afskrif van die getekende dienskontrak;

10.2.1.2 'n afskrif van die benoemde se akte van demissie uit die vorige werkring óf 'n getuigskrif van eervolle ontslag in die geval van diens aan 'n instansie buite die kerkverband óf die akte van legitimasie in die geval van 'n proponent wat beroep is;

10.2.1.3 'n afskrif, indien van toepassing, van die benoemde se attestaat, uitgereik deur die vorige gemeente en ingedien by 'n (ander) gemeente van die NG Kerk; en

10.2.1.4 'n skriftelike bewys van die pensioenkantoor dat die benoemde se pensioen in orde is.

10.2.2 die betrokke sinodale regs-/kerkordekommissie skriftelik bevestig het dat aan die kerkordelik vereistes (sien 10.2.1) voldoen is.

10.3 Die skriba van die beroepende vergadering of die kerkvergadering wat die benoeming gemaak het, rig 'n uitnodiging aan al die bedienaars van die Woord in diens van die ringsgemeentes of in diens van die breër kerkverband om die bevestiging by te woon.

10.4 Die bevestiging in 'n gemeente geskied deur 'n bedienaar van Woord in diens van die gemeente, of die konsulent of 'n ander bedienaar van die Woord met bevoegdheid in die NG Kerk deur die konsulent daartoe versoek.

10.5 Die bevestiging in die kerkverband geskied deur 'n bedienaar van die Woord met bevoegdheid in die NG Kerk deur die betrokke kerkvergadering of sy gevolmagtigde daartoe aangewys.

10.6 Die bevestiging van 'n proponent geskied met oplegging van hande waarmee die bevoegdheid van 'n bedienaar van die Woord verkry word.

10.7 Die bevestiging vind so spoedig moontlik plaas nadat aan die kerkordelike vereistes voldoen is.

10.9 Die kerkraad of ander kerkvergadering stel die betrokke ring, die sinodale kantoor, die Algemene Bevoegdheidsraad en die Kerkbode onverwyld in kennis van die bevestiging, met vermelding van:

10.9.1 die basiese biografiese besonderhede van die persoon wat bevestig is;

10.9.2 die vorige gemeente/werkring;

10.9.3 die datum waarop die bevestiging plaasgevind het;

10.9.4 die gemeente waarin die persoon bevestig is;

10.9.5 die naam van die persoon wat die bevestiging waargeneem het;

10.9.6 die moontlike verandering in bevoegdheid wat plaasgevind het.

10.10 In die geval van 'n proponent of 'n bevoegde bedienaar uit 'n ander gereformeerde kerk wat bevestig is, word:

10.10.1 die betrokke sinodale kantoor versoek om aansoek te doen om die aanstelling as huweliksbevestiger; en

10.10.2 die aktuaris van die sinode versoek om 'n akte van bevestiging uit te reik.

11. DEMISSIE

11.1 'n Bedienaar van die Woord wat 'n beroep na 'n ander gemeente aangeneem het of 'n benoeming vir diens aan die kerkverband aanvaar het, stel die kerkraad of ander kerkvergadering skriftelik daarvan in kennis.

11.2 Die betrokke kerkvergadering in wie se diens die bedienaar van die Woord gestaan het, maak die bedienaar van die Woord op vererende wyse los van die gemeente of ander werkring deur die uitreiking van die akte van demissie.

11.3 Die akte van demissie word onderteken deur die voorsitter en skriba van die betrokke kerkvergadering. 11.4 Die verlening van demissie geskied tydens 'n vergadering of erediens deur die voorsitter of ander lid van die betrokke kerkvergadering.

11.5 Demissie word verleen nadat:

11.5.1 die beroeps- of benoemingsbrief én die getekende nuwe diensooreenkoms aan die ring of sy gevolmagtigde/betrokke sinodale regs-/kerkordekommissie voorgelê is; en

11.5.2 die ring of sy gevolmagtigde/betrokke sinodale regs-/kerkordekommissie skriftelike bevestiging ontvang het dat alle uitstaande verpligtinge teenoor die bedienaar van die Woord met betrekking tot vergoeding, verlof en ander diensvoordele nagekom is.

- 11.6 Die akte van demissie uitgereik deur 'n kerkraad, dien ook as attestaat vir oorpasing van lidmaatskap na die volgende gemeente.
- 11.7 'n Bedienaar van die Woord wat uit diens van die gemeente of die kerkverband bedank, of weens tug- en/of dissiplinêre handeling uit diens van die gemeente of uit diens van die kerkverband ontslaan is (sien Artikel 64.5.4 van die Kerkorde), ontvang by diensbeëindiging 'n dienssertifikaat.
- 12. EMERITAAT**
- 12.1 Bedienaars van die Woord in diens van gemeentes of die kerkverband, moet by bereiking van ouderdom vyf-en-sestig (65) emeriteer.
- 12.2 Geen bedienaar van die Woord kan na emeritering in 'n voltyds-onbepaalde pos in diens wees nie (sien Reglement vir Vaste Termynpos vir diens as emeritus tussen ouderdom 65 en 70).
- 12.3 Die ring, onder wie se opsig 'n bedienaar van die Woord by emeritering staan, reik aan die bedienaar van die Woord by emeritering die akte van emeritaat uit.
- 12.4 Die akte van emeritaat word onderteken deur die voorsitter en skriba van die ring.
- 12.5 Die skriba van die ring stel die betrokke sinodale kantoor, die pensioenkantoor, die Algemene Bevoegdheidsraad én die Kerkbode van die emeritering in kennis.
- 12.6 Die akte van emeritaat kan tydens 'n vergadering of erediens namens die ring oorhandig word.

REGLEMENT VIR DIE VERLOF VAN BEDIENAARS VAN DIE WOORD: IMPLEMENTERING VAN DIE
(vgl Agenda A.14 (Aanvullend bl 50 pt 2.5.3; Notule Dag 4 pt 27)

Die Algemene Sinode versoek kerkrade om vóór die einde van Februarie 2015 tot 'n ooreenkoms met bedienaars van die Woord in gemeentelike diens te kom met die oog op die toepassing van die nuwe Reglement vir die Verlof van Bedienaars van die Woord vanaf 1 Maart 2015 op alle bedienaars van die Woord in dieselfde gemeente.

REGLEMENT VIR VOLTYDS-ONBEPAALEDE POSTE (NUWE REGLEMENT) (vgl Agenda A.14
(Aanvullend) bl 45 pt 1.2.2; Notule Dag 4 pt 27)

REGLEMENT VIR VOLTYDS-ONBEPAALEDE POSTE

1. AARD

1.1 'n Voltyds-onbepaalde pos vir 'n bedienaar van die Woord is 'n voltydse pos met 'n onbepaalde termyn.

1.2 'n Bedienaar van die Woord in 'n voltyds-onbepaalde pos:

1.2.1 verrig die ampspligte van Artikel 9 van die Kerkorde in 'n gemeente soos in die diensooreenkoms vervat;

1.2.2 verrig die pligte in die kerkverband soos in die diensooreenkoms vervat;

1.2.3 ontvang sy/haar volle lewensonderhoud van die gemeente of die kerkverband;

1.2.4 mag nie buite die kerkverband deelydse diens aan 'n ander werkgewer lewer nie.

2. SKEP VAN POS

2.1 Vanaf die stigting tot die ontbinding van 'n gemeente beskik die gemeente oor 'n pos vir bedienaar van die Woord wat of voltyds of deelydse vir 'n onbepaalde of bepaalde termyn gevul word.

2.2 Die vulling van die pos vir bedienaar van die Woord in die gemeente kan met die goedkeuring van die ring vir 'n tyd opgeskort word, terwyl die kerkraad met die hulp van die ring na ander wyses kyk waarop die gemeente bedien kan word (kombinering, eenwording of samesmelting).

2.3 Die beroeping van 'n bedienaar van die Woord vir die vulling van 'n voltyds-onbepaalde pos in die gemeente, kan alleen geskied nadat die kerkraad die ring of sy gevolmagtigde oortuig het van die finansiële volhoubaarheid van die pos en die ring of sy gevolmagtigde daartoe goedkeuring verleen het.

2.4 Die ring of sy gevolmagtigde se goedkeuring word ook verlang by die vulling van 'n voltyds-onbepaalde pos by meerdere bediening in die gemeente.

2.5 Die ring of sy gevolmagtigde adviseer die kerkraad met die opstel van die diensooreenkoms.

2.6 Vergoeding en ander diensvoordele vir 'n voltyds-onbepaalde pos is in ooreenstemming met die sinodale riglyne vir die vergoedingspakket vir bedienaars van die Woord, tensy anders ooreengekom.

2.7 'n Voltyds-onbepaalde pos is pensioendraend met die volgende vereistes:

2.7.1 'n bedienaar van die Woord in 'n voltyds-onbepaalde pos se pensioenbydraevlak word bereken volgens die ooreengekome bydraekategorie;

2.7.2 die werkgewer bepaal die werkgewerbydrae tot die Pensioenfonds aan die hand van die reëls van die Pensioenfonds;

2.7.3 die werkgewer se bydrae bepaal die ooreenstemmende bydraekategorie van die werknemer; en

2.7.4 die minimum bydraekategorie is 100%.

2.8 Nadat die ring of sy gevolmagtigde die pos en die beroepsbrief goedgekeur het, kan die kerkraad

oorgaan tot beroeping.

2.9 By die skep van 'n voltyds-onbepaalde pos in die kerkverband, sien die betrokke kerkvergadering toe dat aan die toepaslike vereistes van hierdie reglement voldoen word.

3. BEROEPING EN BEVESTIGING

3.1 By die beroeping en bevestiging word uitvoering gegee aan die voorskrifte van Artikel 8 (voorgestelde wysiging van Artikel 7 en 8) van die Kerkorde en die Reglement vir die Beroep, Bevestiging, Demissie en Emeritaat vir 'n Bedienaar van die Woord (voorgestelde nuwe Reglement).

3.2 'n Bedienaar van die Woord wie se pos van 'n tentmakerpos of 'n vaste termynpos na 'n voltyds-onbepaalde pos verander word, se diensooreenkoms word diensooreenkomstig gewysig, goedgekeur en onderteken, sonder om weer beroep en bevestig te word.

4. AFVAARDIGING NA MEERDERE VERGADERINGE

'n Bedienaar van die Woord in 'n voltyds-onbepaalde pos word na meerdere vergaderinge afgevaardig.

5. DIENSBEËINDIGING

5.1 'n Bedienaar van die Woord in 'n voltyds-onbepaalde pos tree by aanvaarding van 'n beroep of by bereiking van die normale aftree-ouderdom uit diens van die gemeente/kerkverband.

5.2 By diensbeëindiging/aanvaarding van emeritaat, stel die kerkvergadering die Algemene Bevoegheidsraad daarvan in kennis.

REGLEMENT 12: REGLEMENT VIR TENTMAKERPOSTE (vgl Agenda A.14 (Aanvullend) bl 46 pt 1.2.3; Notule Dag 4 pt 27)

REGLEMENT VIR TENTMAKERPOSTE

2.3.1 Uitvoering word gegee aan die tersaaklike voorskrifte van Artikel 7 van die *Kerkorde*, die *Reglement vir Beroep, Bevestiging, Demissie en Emeritaat van Bedienaars van die Woord*, ander toepaslike bepalinge in reglemente en verbandhoudende besluite.

2.3.4 'n Tentmakerpos is pensioendraend onderworpe aan die volgende vereistes:

2.3.4.1 'n bedienaar van die Woord in 'n tentmakerpos se pensioenbydraevlak word bereken volgens die ooreengekome bydraekategorie;

2.3.4.2 die werkgewer bepaal die werkgewerbydrae tot die Pensioenfonds aan die hand van die reëls van die Pensioenfonds;

2.3.4.3 die werkgewer se bydrae bepaal die ooreenstemmende bydraekategorie van die werknemer;

2.3.4.4 wanneer die bedienaar van die Woord as tentmaker beroep is en reeds by 'n ander wetlik goedgekeurde pensioenfonds ingeskakel is (dit sluit vrywillige annuïteitsfondse uit), is die minimum bydraekategorie 25%.

BEROEPING EN BEVESTIGING

3.1 By die beroeping en bevestiging word uitvoering gegee aan die voorskrifte van Artikel 8 van die *Kerkorde* en die *Reglement vir die Beroep, Bevestiging, Demissie en Emeritaat vir 'n Bedienaar van die Woord*.

REGLEMENT 13: REGLEMENT VIR VASTETERMYNPOSTE (vgl Agenda A.14 bl 258 pt 8.2.2.6, Agenda A.14 (Aanvullend) bl 46 pt 1.2.4, T.14.2 bl 7 pt 6.1.1, T.14.4 bl 12 pt 15.1; Notule Dag 3 pt 17, Dag 4 pt 27, Dag 5 pt 19)

Die Algemene Sinode keur die volgende wysigings van die *Reglement vir Vastetermynposte* goed:

2.3.1 Uitvoering word gegee aan die tersaaklike voorskrifte van Artikel 7 van die *Kerkorde*, die *Reglement vir Beroep, Bevestiging, Demissie en Emeritaat van Bedienaars van die Woord*, ander toepaslike bepalinge in reglemente en verbandhoudende besluite.

2.3.4 'n Vastetermynpos is:

2.3.4.1 nie pensioendraend nie onderworpe aan die volgende voorwaardes:

2.3.4.1.1 indien die termynperiode minder of gelyk aan twaalf maande is

2.3.4.1.2 wanneer die bedienaar van die Woord in 'n termynpos beroep word en reeds by 'n ander wetlik goedgekeurde pensioenfonds ingeskakel is (dit sluit vrywillige annuïteitsfondse uit).

2.3.4.1.3 wanneer 'n emeritus by aanvaarding van 'n vaste termynpos reeds pensioen ontvang.

2.3.4.2 pensioendraend onderworpe aan die volgende voorwaardes:

2.3.4.2.1 wanneer die termyn hernu word en die totale kontrakperiode twaalf maande oorskry, is die pos pensioendraend en moet pensioen ook terugwerkend betaal word vir die vorige kontrakperiode wat nie pensioendraend was nie;

2.3.4.2.2 'n bedienaar van die Woord in 'n termynpos, se pensioenbydraevlak word bereken volgens die ooreengekome bydraekategorie;

2.3.4.2.3 die werkgewer bepaal die werkgewerbydraes tot die Pensioenfonds aan die hand van die reëls van die Pensioenfonds.

2.3.4.2.4 die werkgewer se bydrae bepaal die ooreenstemmende bydraekategorie van die werknemer;

2.3.4.2.5 bedienaars van die Woord wat in 'n vaste termynpos beroep is, mag ook by die pensioenfonds inskakel.

3. BEROEPING EN BEVESTIGING

By die beroeping en bevestiging word uitvoering gegee aan die voorskrifte van Artikel 8 van die *Kerkorde* en die *Reglement vir die Beroep, Bevestiging, Demissie en Emeritaat vir Bedienaar van die Woord*.

4. EMERITI

4.1 'n Emeritus kan tot op ouderdom 70 jaar, met goedkeuring van die ring of sy gevolmagtigde, in 'n vaste termynpos beroep word waarna die emeritus finaal uit kerklike diens tree. 'n Emeritus kan nie ná ouderdom 70 in 'n vaste termynpos aangestel word nie.

4.2 By bereiking van die normale aftree-ouderdom (65 jaar), moet geëmeriteer word sonder dat pensioen noodwendig geneem word.

4.3 'n Emeritus kan weer diens in dieselfde gemeente aanvaar, slegs indien

4.3.1 'n vaste termynpos volgens die voorgeskrewe prosedure geskep is (vergelyk 2.1 tot 2.5 hierbo);

4.3.2 alle verpligtinge by emeritaat nagekom is;

4.3.3 die persoon se mediese geskiktheid bepaal is;

4.3.4 'n nuwe diensooreenkoms aangegaan word;

4.3.5 beroeping en bevestiging in die pos plaasgevind het;

4.3.6 bydraes tot die pensioenfonds voortgesit word indien pensioen nie by emeritaat opgeneem is nie; en

4.3.7 die ander vereistes van hierdie reglement nagekom word.

4.4 'n Emeritus wat by aanvaarding van 'n vastetermynpos reeds pensioen ontvang, is vrygestel van pensioenbydraes.

REGLEMENT 14: REGLEMENT VIR DIE VERLOF VAN BEDIENAARS VAN DIE WOORD (vgl Agenda A.14 bl 259 pt 8.2.2.7; Notule Dag 3 pt 17)

Verlof vir bedieningsontwikkeling val 'n bedienaar van die Woord *pro rata* vanaf datum van diensaanvaarding- indienstreding toe.

REGLEMENT 15: REGLEMENT VIR DIE BESTUUR VAN DIENSVERHOUDINGE BY WANGEDRAG, ONGESKIKTHEID EN ONVERMOË (vgl Agenda A.14 bl 259 pt 8.2.2.8; Notule Dag 3 pt 17)

1. Wysig voetnota 7 om soos volg te lui: Wangedrag deur 'n bedienaar van die Woord as werknemer in diens van 'n gemeente/kerkverband kan ook 'n tugwaardige sonde wees. Die term tug word gebruik vir die kerklike handeling waarmee 'n bedienaar van die Woord as lidmaat en ampsdraer in verband met gemeentelike verhoudinge (leer en lewe) opgevoed, tot orde geroep en getug kan word. Die term *dissipline* word gebruik vir die kerklike handeling waarmee 'n bedienaar van die Woord as werknemer in verband met diensverhoudinge opgevoed, tot orde geroep en gedissiplineer kan word. 'n Tug- of dissiplinêre ondersoek kan dus plaasvind, maar wanneer beide *tug* en *dissipline* ter sprake is, word daar na 'n tug- en dissiplinêre ondersoek verwys.

2. Wysig Pt 2.1.4 soos volg:

2.1.4 Indien die dissiplinêre ondersoek teen 'n bedienaar van die Woord ook 'n ondersoek na 'n tugwaardige sonde insluit, wys die betrokke ring en in oorleg met die ander kerkvergadering saam 'n gevolmagtigde ondersoekliggaam aan, en bekragtig die ring die bevindinge en tugmaatreëls, terwyl die ander kerkvergadering die bevindinge en dissiplinêre maatreëls bekragtig.

REGLEMENT 15: REGLEMENT VIR DIE BESTUUR VAN DIENSVERHOUDINGE BY WANGEDRAG, ONGESKIKTHEID EN ONVERMOË (vgl Agenda T.14.4 bl 8 pt 13.1; Notule Dag 5 pt 19)

1 Die Algemene Sinode wysig die reglement.

2 Die Algemene Sinode versoek die ATR om die numerering by die verdere bepalinge aan te pas.

3 Die Algemene Sinode besluit om en skrap diensooreenkomstig die woorde tussen hakkies, naamlik "insluitend finansiële onvermoë" by Artikel 12.7.3 te skrap.

2.4 Die gemeente/kerkverband se bedienings- en bedryfsvereistes -

Indien 'n kerkraad of die betrokke ring oordeel dat 'n gemeente om finansiële redes nie meer 'n bedienaar van die Woord kan bekostig nie, word die saak op die agenda van die kerkraad geplaas vir hantering aan die hand van die volgende prosedure met verslag aan en goedkeuring deur die ring:

2.4.1 Die kerkraad versoek sy fondsekommissie, om in oorleg met sy kommissie vir diensverhouding en in samewerking met die ring se kommissie vir fondse, die saak formeel te ondersoek.

2.4.2 Die kommissie bepaal die omvang van die finansiële probleem en wend daadwerklike pogings aan om oplossings te soek.¹

¹ Voorbeelde is: voortgesette diens teen verminderde diensvoordele en -verpligtinge, tentmakerbediening, aanstelling in 'n ander pos, standplaaswisseling en kombinasie.

2.4.3 Indien diensbeëindiging die enigste oplossing blyk te wees, pleeg die kommissie oorleg met die bedienaar(s) van die Woord wat waarskynlik deur die beoogde diensbeëindiging geraak sal word.

2.4.4 Die oorlegplegende partye poog om eenstemmigheid te bereik oor:

2.4.4.1 geskikte maatreëls om die diensbeëindiging te vermy, dit tot die minimum persone te beperk, die tydsberekening daarvan te verander en die nadelige gevolge daarvan te versag;

2.4.4.2 die metode van selektering van die bedienaar(s) van die Woord wie se dienste beëindig gaan word; en

2.4.4.3 voorsiening by diensbeëindiging (uittreeloon of skeidingspakket).

2.4.5 Die kommissie voorsien skriftelik aan die bedienaar(s) van die Woord met wie oorleg gepleeg word:

2.4.5.1 die redes vir die beoogde diensbeëindiging;

2.4.5.2 alternatiewe wat oorweeg is voordat diensbeëindiging voorgestel is en die redes waarom elk van die alternatiewe verwerp is;

2.4.5.3 die aantal bedienaars van die Woord wat waarskynlik geraak gaan word;

2.4.5.4 die voorgestelde metode van selektering van welke bedienaar(s) van die Woord se diens beëindig moet word;

2.4.5.5 die datum waarop die diensbeëindiging waarskynlik van krag sal word;

2.4.5.6 die voorgestelde voorsiening by diensbeëindiging (uittreeloon of skeidingspakket);

2.4.5.7 enige bystand wat die kerkraad beoog om aan te bied; en

2.4.5.8 die moontlikheid van 'n toekomstige beroep.

2.4.6 Die betrokke bedienaar(s) van die Woord word geleentheid gebied om verhoër te word oor enige aangeleentheid waarvoor oorleg gepleeg word, en die kommissie oorweeg die verhoër en reageer daarop. Indien die kommissie nie daarmee eens is nie, verstrek die kommissie redes daarvoor.

2.4.7 Die kommissie selekteer die bedienaar(s) van die Woord wie se diens beëindig gaan word volgens maatstawwe waarvoor die oorlegplegende partye ooreengekom het of wat, indien daar nie eenstemmigheid is nie, billik en objektief is.

2.4.8 By bereiking van 'n ooreenkoms en na ondertekening daarvan deur die oorlegplegende partye, beëindig die kerkraad die diens van die bedienaar(s) van die Woord. Indien daar nie eenstemmigheid is nie, besluit die werkgewer op billike en objektiewe wyse in die lig van die voorgeskrewe voorsiening. Diensbeëindiging weens bedryfsvereistes geskied met behoud van die bevoegdheid van bedienaar van die Woord en die uitreiking van 'n akte van demissie.

2.4.9 In gevalle waar die bedienaar van die Woord in diens van die kerkverband is, versoek die kerkvergadering sy kommissie vir fondse, om in samewerking met die sinodale regs-/kerkordekommissee en in oorleg met sy kommissie wat die diensverhouding tussen bedienaar van die Woord en die kerkvergadering hanteer, die saak te ondersoek. Dieselfde vereistes, uiteengesit in 2.4.2 tot 2.4.8 hierbo, en indien nodig aangepas, word nagekom.

2.5 'n Bedienaar van die Woord se diensverhouding kan ook weens tegnologiese (bv. gebrekkige rekenaarvaardigheid), strukturele (bv. oortollige poste by kombinerings, eenwording of samesmelting van gemeentes) of soortgelyke behoeftes (bv. nood en oorlewing, werknemer se onaanpasbaarheid) van die gemeente/kerkverband beëindig word.

2.5.1 Indien 'n kerkraad of die betrokke ring oordeel dat 'n Bedienaar van die Woord nie meer aan die bedieningsvereiste van die gemeente voldoen nie, word die saak op die agenda van die kerkraad geplaas vir hantering aan die hand van die volgende prosedure met verslag aan en goedkeuring deur die ring:

2.5.2 Die kerkraad versoek sy diensverhoudingskommissie, om in oorleg met sy fondsekommissie en in samewerking met die ring se kommissie vir fondse, die saak formeel te ondersoek.

2.5.3 Die kommissie bepaal die omvang van die bedryfsvereistes waaraan hy nie voldoen nie en wend daadwerklike pogings aan om oplossings te soek. Dieselfde prosedure, uiteengesit in 2.4.3 tot 2.4.9 hierbo, en indien nodig aangepas, word gevolg.

REGLEMENT 16: REGLEMENT VIR TUG EN DISSIPLINE (vgl Agenda A.14 bl 260 pt 8.2.2.9; Notule Dag 3 pt 17)

1.4 Indien 'n ring van 'n gevolmagtigde ondersoekliggaam gebruik maak in 'n amptelike tugondersoek, wys hy 'n ondersoekliggaam van ten minste vyf lidmate aan waarvan ten minste drie lede van die ringsvergadering moet wees. Ander kundige lidmate van binne of buite die ring kan ook gekoöpteer word as volwaardige lede van die ondersoekliggaam.

1.5 Indien 'n dissiplinêre en tugondersoek gedoen moet word, wys die ring in oorleg met die ander kerkvergadering 'n ondersoekliggaam aan wat uit ten minste vyf lede bestaan. Ander kundige lidmate van binne of buite die ring kan ook gekoöpteer word as volwaardige lede van die ondersoekliggaam.

REGLEMENT 17: REGLEMENT VIR APPÈL OF BESWAAR (vgl Agenda A.14 bl 260 pt 8.2.2.10; Notule Dag 3 pt 17)

6.2 'n Lidmaat of 'n kerkvergadering wat 'n appèlstuk of beswaarskrif wil indien, moet binne 21 dae nadat die vergadering se goedgekeurde notule beskikbaar gestel is, of nadat die bevindinge van 'n tug- en/of dissiplinêre ondersoek bekend gemaak is, by die meerdere vergadering daarvan kennis gee.

REGLEMENT 20: REGLEMENT VIR DIE VERHOUDING TOT ANDER KERKE EN GROEPE (vgl Agenda A.14 bl 261 pt 8.2.2.11 Art 3; Notule Dag 3 pt 17)

1.Assosiasie

1.1 Nadat 'n formele aansoek ontvang is en beoordeel is, kan die Algemene Sinode met 'n tweederdemeerderheidstem goedkeuring verleen dat ander kerke of kerkgemeenskappe (ingesluit gemeentes van ander kerke) in assosiasie met die NG Kerk tree.

1.2 Die graad en wyse van assosiasie word in elke geval bepaal deur die graad van ooreenstemming ten opsigte van belydenis, kerkorde, erediens en die Christelike lewenswandel, diens en getuienis van die betrokke kerk of kerkgemeenskap.

1.3 'n Ander kerk of kerkgemeenskap se assosiasieverbintenis met die NG Kerk word in 'n assosiasie-ooreenkoms vervat. In hierdie ooreenkoms word wedersydse voorregte en verpligtinge uitgespel, waaronder die wyse waarop daar oor-en-weer in die kerkvergaderinge sitting geneem word (waarnemend, adviserend of stemhebbend) en aan die vergaderinge deelgeneem word. Ander reëlings kan insluit: wedersydse erkenning van opleiding en legitimasie, oor-en-weer aanvaarding van lidmaatskap, kanselruiling met die bevoegdheid om sakramente te bedien, gesamentlike werksaamhede, finansiële verpligtinge, die wyse waarop die assosiasie kan oorgaan tot inlywing by die NG Kerk, die wyse waarop die assosiasie beëindig kan word, ens.

REGLEMENT 21: REGLEMENT VIR DIE VERMEERDERING, KOMBINERING, EENWORDING EN SAMESMELTING VAN GEMEENTES (vgl Agenda A.14 bl 261 pt 8.2.2.12; Notule Dag 3 pt 17)
(Pt 6 – 6.5 word hier geskrap en opgeneem in 'n nuwe reglement vir die wysiging van die belydenis)

REGLEMENT 22: REGLEMENT VIR DIE WYSIGING VAN DIE BELYDENIS (vgl Agenda A.14 bl 262 pt 8.2.2.13; Notule Dag 3 pt 17)

1. Die kerkraad lê sy aanbeveling oor die voorstel van die Algemene Sinode oor die wysiging/ van die belydenis éérs aan die gemeente voor vir die instemming van die belydende lidmate. Nadat die instemming van twee derdes van die lidmate verkry is, finaliseer die kerkraad sy besluit met 'n tweederdemeerderheid, waarna die finale besluit wéér op twee agtereenvolgende Sondae aan die gemeente vir approbasie voorgelê word.

2. Die kerkraad besluit om die instemming van die gemeente soos in 1 hierbo genoem, op een van die volgende twee wyses te verkry:

2.1 Die instemming van belydende lidmate word per geslote stembrief verkry tydens 'n gemeentevergadering wat die kerkraad met die belydende lidmate van die gemeente belê het en waarvan daar by die erediens(te) op vier agtereenvolgende Sondae vooraf kennis gegee is van beide die vergaderdatum en die inhoud van die voorstel. By hierdie vergadering is twee waarnemers deur die ring/sy gevolmagtigde kommissie aangewys, teenwoordig. Die voorsitter en skriba van die kerkraad tree op as voorsitter en skriba van hierdie vergadering.

2.1.1 Lidmate wat 'n wettige verskoning het waarom hulle nie die betrokke gemeentevergadering kan bywoon nie, kan hul stem vooraf per geslote stembrief uitbring. Hierdie stemme word getel nadat die stemming op die gemeentevergadering uitgebring is.

2.2 Die instemming van belydende lidmate word per geslote stembrief verkry wat persoonlik en sonder enige stemwerwing deur die kerkraad aan elke ongesensureerde belydende lidmaat van die gemeente beskikbaar gestel word. Minstens veertien dae moet na ontvangs toegelaat word vir die inhandiging van die stembrief.

2.2.1 Dit is die lidmaat se verantwoordelikheid om toe te sien dat die voltooide stembrief die kerkkantoor van die gemeente voor of op die sperdatum bereik. Die stemtelling vind plaas in die teenwoordigheid van twee waarnemers deur die ring/sy gevolmagtigde kommissie aangewys.

3. Die tweederdemeerderheid van die gemeente se instemming word bepaal deur die getal uitgebragte stemme.

4. Die kerkraad stel deurgaans alle pogings in werking om kerkskeuring te voorkom.

REGLEMENT VIR DIE WYSIGING VAN DIE BELYDENIS (REGLEMENT 22): ELEKTRONIESE STEMPROSES (vgl Agenda A.14 Regte bl 262 pt 8.2.2.13; Notule Dag 5 pt 19)

Die sinode gee opdrag aan die ATR om die moontlikheid van 'n elektroniese stemproses te ondersoek om groot gemeentes se stemproses te vergemaklik en die reglement dienoreenkomstig te wysig. Die ATR gee terugvoering aan die ASM.

REGLEMENT VIR DIE WYSIGING VAN DIE BELYDENIS (vgl Agenda A.14 (Aanvullend bl 52 pt 2.8.3; Notule Dag 4 pt 27)

Die Algemene Sinode verwys Bepaling 3 van die Reglement vir die Wysiging van die Belydenis na die ATR om te besin oor die billikheidsbeginsel van dié punt.

REGLEMENT VIR DIE ALGEMENE STEUNSPAN ARGIEF (vgl Agenda T.14.2 bl 4 pt 2.1.1, A.2 bl 28 pt 2.4; Notule Dag 3 pt 15)

Die Algemene Sinode keur Aanbeveling 2.4 (bl 28) goed: Die Algemene Sinode besluit om die ATA se gewysigde Reglement (Bylaag 1) in sy geheel goed te keur.

REGLEMENT VIR DIE ALGEMENE STEUNSPAN ARGIEF

1. NAAM

Algemene Steunspan Argief (ASA).

2. SAMESTELLING

2.1 Die termyn duur van sinodesitting tot sinodesitting.

2.2 Die Steunspan word saamgestel uit:

2.2.1 die argivaris of persoon belas met die argief uit elk van die kerkargiewe te Stellenbosch, Bloemfontein, Pietermaritzburg, Pretoria (Oostelike Sinode) en Windhoek, met die voorsitter of ander verteenwoordiger van elk van die betrokke argiefkommissies as sekundus;

2.2.2 een verteenwoordiger van die Gesamentlike Sinodale Kommissie van die NG Kerk van Transvaal, met sekundus; en

2.2.3 een kundige op die terrein van argiefwese, met sekundus.

2.3 Vakatures in die Steunspan word deur die Moderamen, op aanbeveling van die Steunspan, aangevul.

3. OPDRAG

Die Steunspan se opdrag is die

3.1 formulering van 'n algemene argiefbeleid vir die Kerk;

3.2 advisering van die onderskeie sinodes se argiefkommissies oor die opstel van argiefreglemente en handleidings;

3.3 koördinering van werksaamhede van die argiewe van die onderskeie sinodes;

3.4 advisering van die onderskeie sinodes se argiefkommissies oor die toepassing van relevante wetgewing;

3.5 kontrolering of die onderskeie argiefbewaarplekke voldoen aan die standaardvereistes vir doelmatige en veilige bewaring van argivalia;

3.6 bewaring en ontsluiting van die Algemene Sinode se eie argivalia by die aangewese bewaarplek(ke);

3.7 opstelling van die *In Memoriam*-verslae oor amptenare/ampsdraers in diens van die Algemene Sinode;

3.8 bekendstelling van die geskiedenis van die Kerk as geheel; en

3.9 verslagdoening aan die Moderamen en die Algemene Sinode.

4. VERGADERINGS

4.1 Die Steunspan vergader minstens een maal per jaar op rotasiebasis.

4.2 Die Steunspan kies by die eerste vergadering van sy termyn 'n voorsitter, ondervoorsitter en skriba. 'n Lid kan nie vir meer as twee termyne in dieselfde posisie verkies word nie.

4.3 Die Steunspan beskik nie oor 'n dagbestuur nie.

REGLEMENTE VIR DIE HANTERING VAN ARGIEF- EN MUSEUMMATERIAAL EN REGISTERS (vgl Agenda T.14.2 bl 4 pt 2.3.1.1, A.3 bl 29 pt 4.3; Notule Dag 3 pt 15)

Die Algemene Sinode verwys die voorgestelde reglemente vir die hantering van argief- en museummateriaal en registers na die onderskeie sinodes vir oorweging en opname in die sinode se eie kerkordeboek.

REGLEMENT VAN DIE MODERAMEN (vgl Agenda A.12 bl 125 pt 3.4, A.12.2 (Aanvullend) bl 28, T.14.3 bl 5 pt 4.1.2; Notule Dag 4 pt 28)

Die Algemene Sinode keur die gewysigde Reglement vir die Moderamen goed met die nota dat die finansiële implikasies van die uitgebreide vergadering (pt 4.2) met sinodes onderhandel moet word:

REGLEMENT VIR DIE ALGEMENE SINODALE MODERAMEN

1. NAAM

Moderamen van die Algemene Sinode (ASM).

2. SAMESTELLING

2.1 Die Moderamen word soos volg saamgestel:

2.1.1 die lede van die Moderatuur wat tydens die Algemene Sinode verkies is;

2.1.2 vier addisionele lede met sekundi deur die Algemene Sinode verkies; en

2.1.3 een lid met sekundus uit elke sinode deur die sinode of sy gevolmagtigde genomineer en deur die Algemene Sinode verkies.

2.1.4 Die algemene sekretaris dien met adviserende stem in die Moderamen.

2.2 Die Moderamen se samestelling sluit in:

2.2.1 ten minste drie vroue waarvan

2.2.1.1 een 'n gelegitimeerde moet wees; en

2.2.1.2 twee nie-gelegitimeerdes moet wees.

2.3 Die Moderamen word verkies vir die termyn tot by die volgende gewone Algemene Sinode.

2.4 Moderatuurslede kan slegs twee volle termyne in dieselfde hoedanigheid dien.

2.5 Wanneer 'n vakature ten opsigte van 2.1.1 en 2.1.2 ontstaan, word die vakature by wyse van 'n verkiesing deur die Moderamen uit die afgevaardigdes na die vorige Algemene Sinode gevul, met inagneming van die vereistes onder 2.2 gestel.

2.6 Wanneer 'n vakature ten opsigte van 2.1.3 ontstaan, nomineer die betrokke sinode 'n ander lid en/of sekundus om by die eersvolgende vergadering van die Moderamen verkies te word.

2.7 'n Sinode kan voor die volgende Algemene Sinode 'n lid en/of sekundus onder 2.1.3 verkies, vervang deur 'n ander lid en/of sekundus te nomineer wat deur die Moderamen verkies word.

2.8 Die kantoor van die Algemene Sinode behartig die sekretariaat van die Moderamen.

2.9 Die moderator van die vorige Algemene Sinode tree op as voorsitter van die Moderamen met die assessor as ondervoorsitter. Die aktuaris van die Algemene Sinode dien as aktuaris van die Moderamen.

3. OPDRAG

3.1 Die Moderamen neem aanspreeklikheid vir leierskap en geestelike onderskeiding tussen sinodesittings met betrekking tot die sake wat met die taak van die Algemene Sinode (Artikel 43) ooreenkom en die opdragte wat die Algemene Sinode dienooreenkomstig aan die Moderamen gee.

3.2 Die Moderamen

3.2.1 bestuur die strategiese prioritisering van die Algemene Sinode;

3.2.2 wys projekspanne aan indien dit nie tydens die Algemene Sinode in sitting geskied het nie;

3.2.3 koördineer en integreer tussen sinodesittings die werksaamhede van die Algemene Sinode op strategiese gebied aan die hand van Artikel 43;

3.2.4 hanteer tussentydse sake met verslag aan die Algemene Sinode;

3.2.5 tree op as die ledevergadering van die Algemene Sinode se mediamaatkappye;

3.2.6 belyn die werksaamhede van die kerklike maatskappye en ander regsenteite met die strategie en prioriteite van die Algemene Sinode;

3.2.7 adviseer die direksies van die mediamaatkappye rakende die aanstelling van die uitvoerende hoof en die aanstelling van die redakteur van die *Kerkbode*;

3.2.8 werk ten nouste saam met die leierskapstrukture in die sinodes rondom kommunikasie en uitvoering van besluite;

3.2.9 keur, wanneer die Algemene Sinode spesiale volmag daartoe gee, reglemente en reglementwysigings vir die werksaamhede van die Algemene Sinode goed;

3.2.10 wys, soos vakatures mag ontstaan, lede van die Ouditkomitee aan, wanneer die Algemene Sinode nie in sitting is om dit te doen nie;

3.2.11 keur die begroting vir die werksaamhede van die Algemene Sinode goed op aanbeveling van die Bedryfspan, wanneer die Algemene Sinode nie in sitting is om dit te doen nie; en

3.2.12 keur die jaarlikse geouditeerde finansiële state en die bestuursbrief goed, wanneer die Algemene Sinode nie in sitting is om dit te doen nie.

4. KONSTITUERING EN VERGADERINGS

4.1 Die Moderamen konstitueer by die verdaging van die Algemene Sinode.

4.2 Die Moderamen vergader minstens twee maal per jaar. Indien nodig, kan ook van die elektroniese vergaderingswyse gebruik gemaak word. Een van hierdie vergaderings is 'n uitgebreide vergadering met 'n maksimum van vyf bykomende lede uit elke sinode en op koste van die sinode.

5. MODERATUUR

5.1 Die Moderamen brei die verkose Moderatuur uit met ten minste twee lede waarvan ten minste een 'n vrou en een 'n nie-gelegitimeerde moet wees.

5.2 Die Moderatuur tree as interimliggaam op tussen vergaderings van die Moderamen met die oog op tussentydse werk met verslag aan die Moderamen.

REGLEMENT VAN DIE BEDRYFSPAN (vgl Agenda A.12.2 (Aanvullend) bl 29, T.14.3 bl 6 pt 6.1.2; Notule Dag 4 pt 28)

1 Die Algemene Sinode keur die gewysigde Reglement vir die Bedryfspan (voorheen Bestuurspan) goed:

REGLEMENT VIR DIE BEDRYFSPAN

- 1. NAAM**
Bedryfspan van die Algemene Sinode (ASB).
- 2. SAMESTELLING**
 - 2.1** Die Bedryfspan word deur die Algemene Sinode saamgestel uit
 - 2.1.1** twee senior personeellede van die kantoor van die Algemene Sinode;
 - 2.1.2** twee lede van die Algemene Steunspan Fondse en Bates;
 - 2.1.3** twee lede van die Algemene Steunspan Regte;
 - 2.1.4** twee lede van die Steundiens Menslike Hulpbronne; en
 - 2.1.5** die algemene sekretaris.
 - 2.2** Die Bedryfspan koöpteer kundige lede soos nodig.
 - 2.3** Die kantoor van die Algemene Sinode behartig die sekretariaat van die Bedryfspan.
 - 2.4** Die Bedryfspan kies 'n voorsitter en ondervoorsitter uit eie geledere.
- 3. OPDRAG**
Die Bedryfspan se opdrag is:
 - 3.1** die uitvoering van take/opdragte van die Algemene Sinode en die Algemene Sinodale Moderamen aan die Bedryfspan;
 - 3.2** die operasionele bestuur en koördinering van die bedryf en steundienste (administrasie, fondse en bates, regte, menslike hulpbronne en kommunikasie) van die Algemene Sinode;
 - 3.3** die bedryfsondersteuning van die strategiese werksaamhede van die Moderamen;
 - 3.4** die verlening van die dag-tot-dag bedryfsondersteuning aan die projekspanne van die Algemene Sinode;
 - 3.5** die koördinering van die werksaamhede van steundienste en steunspanne;
 - 3.6** die aanwysing van die lede van die steunspanne waar dit nie tydens die Algemene Sinode in sitting geskied het nie;
 - 3.7** die daarstel van 'n kantoor/kantore vir die werk van die Algemene Sinode;
 - 3.8** die vasstel van beleid vir die Algemene Sinode se bedryfsondersteuningsstelsel;
 - 3.9** die finalisering van die begroting vir die werksaamhede van die Algemene Sinode in oorleg met die Steunspan Fondse en Bates;
 - 3.10** die voorlegging van die begroting aan die Algemene Sinode vir goedkeuring, of voorlegging aan die Moderamen, wanneer die Algemene Sinode nie in sitting is om dit te doen nie;
 - 3.11** die aanstelling van personeel in die kantoor van die Algemene Sinode in ooreenstemming met die personeelbeleid, op aanbeveling van die Steundiens Menslike Hulpbronne en in oorleg met die Steunspan Fondse en Bates;
 - 3.12** die goedkeuring van die diensooreenkomste van personeel in ooreenstemming met die personeelbeleid en op aanbeveling van die Steundiens Menslike Hulpbronne; en
 - 3.13** die vasstelling van die jaarlikse registrasiefooi vir gelegitimeerdes met die oog op die behoud van bevoegdheid.
- 4. VERGADERINGS**
 - 4.1** Die Bedryfspan vergader minstens eenmaal per kwartaal.
 - 4.2** Die Bedryfspan het nie 'n dagbestuur nie.

2 Die Algemene Sinode besluit om in die lig van 3.7 en 3.11 van die Reglement van die Bedryfspan die Kerkorde soos volg te wysig (met tweederdemeerderheidstem):

ARTIKEL 45

Die Algemene Sinode mag artikels van die *Kerkorde*, met die uitsondering van Artikel 44.1 en 44.2 van die *Kerkorde*, met 'n tweederdemeerderheidstem óf opskort óf daarvan vrystelling verleen.

ARTIKEL 46

46.1 Die Algemene Sinode organiseer sy werksaamhede na behoefte.

46.2 Die Algemene Sinode mag reglemente opstel met die oog op die uitvoering van Artikel 45.1.

ARTIKEL 47

Verval.

RING: ROL VAN DIE (vgl Agenda A.3 bl 52 pt 3.3.5.3; Notule Dag 5 pt 15)

1 Die Algemene Sinode bevestig weer die rol en taak van die ring soos omskryf in die Kerkorde Artikels 29-31.

2 Die Algemene Sinode gee opdrag aan die Moderamen om prosesse in plek te plaas waar sinodes ondersteun kan word met die bemagtiging van ringe.

SAAMWOON:HUWELIK/SAAMWOON (vgl Agenda A.10.1 bl 89 pt 3.2, B.18 – B.22; Notule Dag 4 pt 13)

1 Die Algemene Sinode probeer om tans die volgende perspektiewe ten opsigte van saamwoonverhoudings te stel in die besef dat dit saamhang met omvattende sake soos die huwelik, egskeiding en seksuele etiek van gelowiges, wat deurlopend met deernis en sensitiwiteit deur die kerk onderskei en begelei moet word. Die verskillende punte hieronder moet daarom deurgaans met mekaar in verband gelees word.

2 Die Algemene Sinode besef dat die huwelik soos ons dit vandag ken die produk van eeue se ontwikkeling is. Daarom kan sommige huweliksgebruike soos in die Bybel beskryf, byvoorbeeld leviraatshuwelike en die vrou as besitting van die man, nie sonder meer dien as riglyne vir hoe Christelike huwelike vandag behoort te wees nie.

3 Die Algemene Sinode is daarvan oortuig dat die historiese ontwikkeling van die huwelik in die Bybel en in die geskiedenis vir ons duidelike riglyne bied van wat 'n Christelike huwelik is: 'n vaste, formele ooreenkoms tussen twee persone van die teenoorgestelde geslag om hulle lewens in alle opsigte met mekaar te deel in 'n lewenslange verbintenis waarin seksualiteit 'n eksklusiewe karakter dra, geseën of bevestig deur die kerk, gesluit in die teenwoordigheid van getuies, sover as moontlik in die gemeenskap van gelowiges en verkieslik erken deur die staat as 'n wettige huwelik.

4 Die Algemene Sinode oordeel dat, in die lig van bostaande, gelowiges met reg die huwelik 'n gawe van God noem en dat seksuele gemeenskap buite so 'n vaste, formele verbintenis/verhouding nie aan Christelike riglyne voldoen nie.

5 Die Algemene Sinode is daarvan bewus dat saamwoonverhoudings (wat die seksuele insluit) vandag 'n werklikheid in die samelewing is. Daar is verskillende redes waarom mense saamwoon. Sommige mense woon saam omdat hulle seksuele eksklusiwiteit nie as 'n belangrike aspek van 'n verhouding beskou nie. Hierdie verhoudings is weens die nie-permanente en selfsugtige aard daarvan, eties onaanvaarbaar.

6 Die Algemene Sinode is egter bewus daarvan dat daar ander redes is waarom sommige pare saamwoon. Sommige woon saam met die argument dat hulle seker wil maak dat hulle in alle opsigte by mekaar pas, voordat hulle trou. Van hierdie verhoudings streef in sekere opsigte na die Bybelse waardes van liefde, respek en eksklusiwiteit. Tog is dit minder as wat die Christelike verstaan van die huwelik verwag en word daarom ontmoedig (soos gewysig deur Tydelike Taakspan Leerstellige en Aktuele Sake).

7 Die Algemene Sinode wil mense wat in 'n saamwoonverhouding leef, aanmoedig om die verbintenis nog vaster te maak deur die kerklike en staatkundige aspekte in plek te kry.

8 Die Algemene Sinode beskou die reëlings van mediese fondse en pensioenskemas wat voordele van mense ontnem wanneer hulle na die dood van 'n eggenoot/eggenote weer in die huwelik tree, as eties problematies en onderneem om nogeens met die betrokke owerhede hieroor in gesprek te tree.

9 Die Algemene Sinode aanvaar dat al die implikasies rondom die bevestiging van 'n enkel kerklike huweliksverbintenis nog nie uitgeklaar is nie en is daarom op hierdie stadium nie ten gunste van so 'n reëling nie.

SAKRAMENTE: SAMEHANG VAN DIE SAKRAMENTE IN VERBONDS-TEOLOGIESE PERSPEKTIEF

(vgl Agenda A.10.2 bl 98 pt 11; Notule Dag 4 pt 10)

1 Die Algemene Sinode moedig gemeentes aan om in die *viering* van die sakramente die belydenis van die kerk voor oë te hou en die samehang van die twee sakramente te verreken.

2 Die Algemene Sinode moedig gemeentes aan om in die *kategetiese onderrig* die samehang van die sakramente uit te lig en die kardinale rol daarvan in die proses van geloofsformasie tot sy reg te laat kom.

3 Die Algemene Sinode moedig *ouers* aan om in hulle *saamleef met hulle kinders* die troosryke werklikheid van die sakramente na die oppervlak te laat kom in gesprek en lewensvoorbeeld in ooreenstemming met die doopbelofte.

SWAZILAND EN ANCHOR OF HOPE: OFFERGAWE VIR (vgl Notule Dag 3 pt 12)

Die Algemene Sinode besluit om afgevaardigdes te versoek om die geld wat hulle sou spandeer op 'n ete vir Donderdagmiddag 10 Oktober 2013 as dankoffer aan die volgende twee instansies op 'n 50-50%-basis te skenk:

- 1. Die Swaziland Reformed Church vir die aankoop van kos en verspreiding daarvan vir die honger mense soos deur die kerk goedgevind.**
- 2. Die Anchor of Hope gemeente van Port Elizabeth om dieselfde te doen.**

TAAKSPANNE (vgl Notule Dag 5 pt 17)

Die taakspanne soos goedgekeur, word in die notule weergegee.

TEOLOGIESE OPLEIDING: AARD VAN TEOLOGIESE OPLEIDING (vgl Agenda A.15.1 bl 265 pt 6.1.3; Notule Dag 2 pt 33)

1 Die Algemene Kuratorium herbesoek die goedgekeurde profiel van die afgestudeerde student en formuleer duidelike uitkomst/ bevoegdheids vir die opleiding van leraars (eerste- en tweedeloopbaan-studente) en kerklike dienswerkers.

2 Die Algemene Kuratorium stel vas watter kerklike bedieningsvorming komplementêrend aangebied moet word vir voornemende leraars van die NG Kerk. Die kerklike opleiding in bedieningsvorming is die opleiding waarvoor die kerk self verantwoordelikheid aanvaar en wat deur die studente suksesvol voltooi moet word naas die akademiese opleiding om gelegitimer te word.

TEOLOGIESE OPLEIDING: AMPSBESKOUING (vgl Agenda A.15.1 bl 265 pt 6.2.2; Notule Dag 2 pt 33)

Die Algemene Sinode gee opdrag aan die Algemene Kuratorium om 'n studie oor die ampte en die bediening te maak en die Sinode met aanbevelings daarvoor te dien. In die studie moet erns gemaak word met die Bybelse getuigenis oor die amp, daar moet gekyk word na die beklemtonings van die Reformasie en gevra word hoe 'n gereformeerde amps- en bedieningsteologie vir ons tyd en konteks daar moet uitsien. In die studie moet aangesluit word by die ekumeniese gesprek oor die amp.

TEOLOGIESE OPLEIDING : EKKLESIOLOGIE (vgl Agenda A.15.1 bl 265 pt 7.2; Notule Dag 2 pt 33)

1 Die Algemene Kuratorium neem die besluite van die Algemene Sinode oor teologiese opleiding, die missionale kerk, gereformeerde identiteit en die A tot Z-Handleiding as vertrekpunte vir die besinning oor teologiese opleiding en die formulering van 'n toepaslike beleid vir predikante van die kerk (kyk Bylaag 1).

2 Die Algemene Sinode vul die Reglement vir die Opleiding en Legitimasië van Bedienaars van die Woord (Reglement 10) soos volg aan:

2.1 Die keuringsproses van teologiese studente word in lyn met die A tot Z-Beleid verder ontwikkel en kandidaatsbevoegdheid word deur die kuratoria verleen aan goedgekeurde studente (eerste en tweede loopbaan).

2.2 Die Algemene Sinode skep in lyn met die skema (aangedui onder pt 11.2 van die Agenda) nuwe moontlikhede vir tweedeloopbaanstudente sodat hulle voor- en nagraads deelyds kan studeer ter voorbereiding vir die voltydse bediening in die NG Kerk. Hierdie studente word hanteer deur die Algemene Kuratorium.

2.3 Die Algemene Sinode skep die geleentheid vir kerklike werkers om geakkrediteer te word met die oog op spesifieke dienswerk in die kerk/gemeentes (kyk voorstelle onder pt 10.4 van die Agenda).

2.4 Die Algemene Sinode volstaan met die huidige vereistes rondom die grondtale vir die opleiding van predikante naamlik Hebreeus II en Grieks II.

2.5 Die Algemene Kuratorium word versoek om ondersoek te doen na verdere onderrigmoontlikhede in die grondtale:

***1 in belang van gelykstaande kompetensie in die grondtale vir teologiese opleiding (vergelyk pt 11 van skematiese voorstelling in die Agenda).**

***2 in belang van die benutting van die grondtale in die bediening en wat aangebied kan word in 'n program van voortgesette bedieningsontwikkeling.**

TEOLOGIESE OPLEIDING: OPLEIDING AAN EKUMENIESE FAKULTEITE (vgl Agenda A.15.1 bl 266 pte 8.2; Notule Dag 2 pt 33)

1 Die Algemene Sinode verwelkom die wyer ekumeniese blootstelling van ons studente.

2 Die Algemene Sinode dra dit aan die Algemene Kuratorium op om verder oor die betekenis van 'n missionale kerkbegrip binne die gereformeerde tradisie vir teologiese opleiding te besin.

3 Die Algemene Sinode onderhandel via die Algemene Kuratorium in oorleg met die drie kuratoria en dosenterade van die drie teologiese fakulteite in die lig van bogenoemde oor die inhoud en aanbieding van teologiese opleiding deur die betrokke fakulteite (kyk Reglement 10).

TEOLOGIESE OPLEIDING EN KERKHERENIGING (vgl Agenda A.15.1 bl 266 pt 9.2; Notule Dag 2 pt 35)

Die Algemene Sinode versoek die Algemene Kuratorium om met soortgelyke liggame van die kerke in die NG Kerk familie in gesprek te tree oor die aanbieding en belyning van teologiese opleiding deur die kerke.

TEOLOGIESE OPLEIDING: VOLTYDSE EERSTELOOPBAANSTUDENTE (vgl Agenda A.15.1 bl 267 pt 1.2.5 ; Notule Dag 2 pt 35)

1 Die Algemene Sinode keur pt 10.2.1 tot 10.2.4.3 goed.

2 Die Algemene Sinode keur die voorgestelde werkswyse in pt 10.3.3.1 tot 10.3.3.9 goed.

TEOLOGIESE OPLEIDING: SKEMATIESE VOORSTELLING (vgl Agenda A.15.1 bl 268 pt 11; Notule Dag 2 pt 35)

Die Algemene Sinode voeg by “Keuring” onder 11.3 in: “Keuring van kerklike werkers deur Kuratorium.”

TEOLOGIESE OPLEIDING: KAPASITEIT (vgl Agenda A.15.1 bl 270 pt 12.2; Notule Dag 2 pt 35)

Die Algemene Kuratorium doen ondersoek na die skep van die nodige kapasiteit vir die ontwikkeling en administrasie van kerklik teologiese opleiding met die oog op die evaluering van roepingsbewustheid, alternatiewe moontlikhede vir teologiese opleiding, beurse en samewerking tussen die drie fakultete tov teologiese en voortgesette teologiese opleiding.

VDDG (vgl Agenda A.5.1 bl 64 pt 12; Notule Dag 5 pt 3)

1 Die Algemene Sinode bevestig dat die Verenigde Diensgroep vir Diens en Getuienis ’n belangrike bydrae maak tot die vestiging van ’n gesamentlike diens en getuienis deur die vier deelnemende kerke en versoek die Moderamen om ’n proses te inisieer ten einde die opdrag en mandaat van die VDDG in meer detail te omskryf. In die proses moet spesifiek aandag gegee word aan eerstens die verhouding tussen die VDDG en die CLF, KMDR en Hugenote Kollege en tweedens die mandaat aan die VDDG om as ledevergadering van die CLF te funksioneer wat ook ’n beheerraad vir CLF kan aanstel .

2 Die Algemene Sinode versoek die Moderamen om in die 2014/2015 begroting reeds aandag te gee aan die kapasiteitsbehoefte van die VDDG.

VDDG: OPDRAG EN MANDAAT (vgl Agenda T.14.3 bl 3; Notule Dag 5 pt 3)

1 Die Algemene Sinode keur aanbeveling 12.1 (Agenda bladsy 64) goed.

2 Die Algemene Sinode versoek die ASM om in uitvoering van Bepaling 5.6 van die Reglement vir Christelike Lektuurfonds te besluit om so spoedig moontlik na die Algemene Sinode in eie hoedanigheid, óf by wyse van ’n opdrag aan ’n ander taakspan óf ’n ander regs persoon/regspersone, die Lede en Bestuur vir die Christelike Lektuurfonds van die Nederduitse Gereformeerde Kerk aan te wys.

3 Die Algemene Sinode versoek die ASM om tydens die kerkherenigingsgesprekke met die ander lidkerke van die NG Kerkfamilie in gesprek te tree met die oog op die gesamentlike beheer van die kerke se onderskeie afsonderlike regsentiteite en die vorming van gesamentlike ledevergaderings om direkteure/beheerraadslede aan te wys. Kerkordelike reëlings in dié verband vervat in ’n tussenorde (“common set of rules”) behoort ernstige oorweging te geniet.

4 Die Algemene Sinode keur in die lig van bostaande nie aanbeveling 6.2 (Agenda bladsy 86) goed nie.

VERLOFUITBETALING: BEREKENING BY (vgl Agenda A.14 (Aanvullend bl 52 pt 2.7.3; Notule Dag 4 pt 27)

1 Die Algemene Sinode neem kennis van hierdie inligting; en

2 Die Algemene Sinode versoek die ABR om hierdie riglyne op te neem in die hersiening van die Bestuurshandleiding vir Diensverhoudinge.

VLUGTELINGE, VREEMDELINGE IN ONS MIDDE (vgl Notule Dag 4 pt 5)

1. Die Algemene Sinode doen ’n beroep op ons lidmate om uit te reik na die vlugteling, om hulle met respek en waardigheid te behandel en om goeie bure te wees vir ons medemense.

2. Die Algemene Sinode doen ’n ernstige beroep op al ons gemeenskappe om hulle te weerhou van enige vyandigheid teenoor kwesbare mense in ons midde.

3. Die Algemene Sinode versoek die Suid-Afrikaanse regering om die regte van die vreemdelinge in ons midde te bevestig en te verdedig.

4. Die Algemene Sinode doen verder ’n beroep op ons regering om beslissend in te gryp om die vloei en integrasie van vlugteling in ons midde te reguleer, sodat die konsentrasie van vlugteling in sekere plekke nie ’n onhoudbare las op arm gemeenskappe word nie.

5. Die Algemene Sinode versoek die regering om die saak van vlugteling deel van ons nasionale welsynsopdrag te maak.

6. Die Algemene Sinode bid tot God, wat in die Kind Jesus saam met sy nederige ouers vlugteling in Egipte was, om die vreemdelinge tussen ons te beskerm, om ons eie harte met ontferming teenoor

hulle te vul en om die lig van Christus se teenwoordigheid te laat skyn in ons bediening van omgee en sorg aan die ontwrigtes.

7. Die Algemene Sinode dra dit aan die Moderatuur op om saam met die familie van NG Kerke en die breë Ekumene hierdie saak op te neem met die betrokke rolspelers, sodat die vreemdelinge tussen ons in ons ontfermende uitreik na hulle die liefdevolle hart van ons Here sal ervaar.

VROUE IN DIE KERK (vgl Agenda A.11.2 bl 123 pt 5; Notule Dag 2 pt 26)

1 Die Algemene Sinode besluit om die Vrouelessenaar se werksaamhede as prioriteit te aanvaar.

2 Die Algemene Sinode versoek die Vrouelessenaar om die netwerk van kundiges te koördineer en jaarliks byeen te bring.

3 Die Algemene Sinode keur goed dat die Vrouelessenaar namens die NG Kerk met vroue in ander kerke, die NG Kerkfamilie en vroue-organisasies skakel.

4 Die Algemene Sinode keur die Vrouelessenaar se betrokkenheid by die Reformatoriese Christenvroueforum goed.

VRYMESSELAARS: BESLUIE VAN DIE ALGEMENE SINODE (vgl Agenda A.14 bl 257 pt 7.2; Notule Dag 3 pt 17)

Die Algemene Sinode besluit dat die besluite oor die Vrymesselary wat geneem is deur die Algemene Sinode 1990, opgeneem word in die *Kerkorde* onder die *Funksionele Besluite*.

WETENSKAP EN TEOLOGIE (GELOOF) (vgl Agenda A.10.1 bl 91 pt 9.3; Notule Dag 4 pt 26)

1 Die Algemene Sinode besluit om die dokument *Oor geloof en die wetenskap* (afsonderlike publikasie voor die vergadering) as gespreksdokument binne die NG Kerk te ondersteun en moedig kerkrade en gemeentes aan om daarmee openhartige gesprek oor hierdie aktuele saak in hulle eie konteks te stimuleer.

2 Die Algemene Sinode sal enige kommentaar op hierdie dokument met die oog op 'n verbetering daarvan verwelkom. Kommentaar en voorstelle kan gestuur word aan die skriba van die Taakspan vir Leerstellige en Aktuele Sake (kommunikasie@kaapkerk.co.za).

3 Die Algemene Sinode ondersteun die druk van 'n verbeterde weergawe (indien aanvaarbare wysigings ingedien word) en sal 'n versoek aan Bybel Media in hierdie verband ondersteun met die oog op beskikbaarstelling aan gemeentes.